



Thurin

GIFTED BY
RAH KAMAHMUM HSE
LIBRARY FOUNDATION
112, JO. LAUR PANG
SALCUTTA, 1964

KRISTIAN S A K H A W L U N G P H U M

MZ
230
SIA

Mizoram State Library
DG1467



SYNOD PUBLICATION BOARD



Thurin

**KRISTIAN
SAKHAW
LUNGPHUM**

**Ziaktu
Rev. Siamhnuna**

Mizoram State Library
DG1467



SYNOD PUBLICATION BOARD

**PUBLISHED
BY
THE SYNOD PUBLICATION BOARD
AIZAWL, MIZORAM**

**Third Edition 1982
Copies 2,000
(All rights reserved)**

MIZORAM STATE LIBRARY
Acc. No. 29 1467 ---
Acc. by SP ---
Class by 1982 ---
Date by 1982 ---
Sub Heading by --- ---
Transcribed by --- ---
Location No : ---

**Printed
at
The Nazareth Press,
Aizawl, Mizoram.**

ZIAKTU THUHMAHRUAI

Mizo Thingtlâng Kristiante hian duh anga lehkhabu chhiar tur kan la nei ngai lo va. Pathian thu — Thurin lampang zia^h turin Upa thenkhatten min sâwm^hthin a. Kan Sapten Thurin lam lehkhabute min zia^h sak kan beisei thin a. Tlêm tlêm chu an zia^h ngei baw^h a; mahse chûngte chu an tha êm êm chungin, mi mâwlten kan la zui zo lo va. Mi mâwlte rilrem tâwk tur ngaihtuahin hun rei tak chhungin ka khâwl khâwm a. Tunah hian kim lo hle mah se, miten an ngaihtuah zau zel theih nan kawng zawnna ang chauhvîn ka han zia^h a. Pathianin malsawm rawh se.

July 15, 1947
Lâmzâwl.

Siamhnuna.

THUHMAHRUAI (Introduction)

He "Kristian Sakhaw Lungphûm" bu hi a ziaktuin min chhiartir a, ngun takin, ngaihtuah tak chungin ka chhiar a, tha ka ti ngei mai. A ziaktu hi kan mi thiam berte zinga pakhat a ni baw k a, a ngaihtuah thiamin, a zia k chhuak Chiang thiam ngeiin ka hria. Hetianga lehkhabu tawi tê siah chuan hetianga zia k kim thiam leh tifi ah thiam mi an awm bikin ka ring lo ve.

Heti ang chi hi Mizo jawngah lehkhabu kan la nei lo va, kan Kohhran tan leh a chhiartu apiang tan a pawimawhin, a tangkai em em ang tih ka ring a ni. Kristian thurin bulpui vuan fuh lote tan chuan kal dik a har thin a, the bu ah hian chuti ang thu bul chuga chuang kim tâwk hle a, a chhiartu apiang tan hrwaitu tha tak a ni ang tih ka ring.

He bua chuang ang hi chu Kristian tumah in an hnial lo vang a, Kohhran pâwl hrang tin tan pawh a la dik tâwk vek tur chin a ni a. Kan vel Kohhran tam tak tan pawh a tangkai em em tur niin ka ring. Pathian malsawmin kan Zo ram Kohhran leh a chhehvêla mite tan pawh tangkai tak a nih ka beisei e.

PUBLICATION BOARD THUCHÂNG

Synod Publication Board chuan lehkhabu thar buatsaih bâkah lehkhabu chhuah tawhte zinga a tangkai zualte chhut nawn hna hi a hmâ tel a. He lehkhabu pawh hi chutiang chi zinga mi chu a ni.

He lehkhabu chhut nawn tura buatsaihnaah hian ngun taka en chhuah a ni a. Ennawn hming pu lêm lo mah se, khawimaw lai laiah chuan han siamrem hlek hlek lai chu a awm lo thei lo a ni.

Kristian Sakhaw Lungphum hian a hming a pu zo viau mai. Kristiante inngahna thurin bulpui chu tawi fel takin a fûn kim vek tih theih a ni e. Miten an tangkaipui hle a ni ang, tum hnih lai chhut a ni tawh chungin lei tur a awm lo leh reng tawh a. Kan ram Kristian lo pung zelte tan lehkhabu tangkai a la nih zel theih ringin a chhut thumna hi a lo chhuak ta a ni.

7.6.1982
Aizawl.

C. Sangzuala
Editor,
Synod Publication Board

A CHHUNGA THU AWMTE

Phêk

1.	Ziaktu thuhmâ	...	...	...	iii
2.	Thuhmahruai	...	...	...	iv
3.	Synod Publication Board thuchâng	..			v
4.	Bung 1 Pathian lehkhabu	...	...		1
5.	Bung 2 Pathian	...	...	...	9
6.	Bung 3 Isua Krista	...	...		18
7.	Bung 4 Thlarau Thianghlîm	...			27
8.	Bung 5 Pathiana Mi Pathum	...			34
9.	Bung 6 Mihring	...	...	...	36
10.	Bung 7 Sual	...	...	...	41
11.	Bung 8 Pathian nêna inremna	...			46
12.	Bung 9 Piantharna	...	...	...	48
13.	Bung 10 Kohhran	...	...	...	55
14.	Bung 11 Sakraments	...	...	...	58
15.	Bung 12 Thil hnahnungte	...	...		63

BUNG I

PATHIAN LEHKHABU

Pathian Lehkhabu hi Bible vuah a ni a. Bible tih chu Grik jawnga Biblos an tih chu a ni a, a awmzia chu Lehkhabu tihna a ni. A chhung thute avangin lehkhabu dang aini a chungnungin a lâr bik a, 'Bible' tia lam ngawt pawhin, Kristiante Sakhaw bu a ni tih hriat zel a ni.

He Lehkhabu hi Thuthlung pahnih fin khawm a ni a – Thuthlung Hlui leh Thar chu. Thuthlung Hlui chu bu 39 fin khawm a ni a, Thuthlung Thar chu bu 27 fin khawm a ni.

Thuthlung Hlui hi an ziaak tihna ber chu Hebrai jawng a ni a, (châng tlem deuh erawh chu **Kaldai** jawng, Aramaic jawng an tih tâk Isua hun laia an jawng tuallêng ber a ni). Thuthlung Thar erawh chu Grik jawnga ziaak a ni.

Lehlinna hrang hrangte : Hebraite hi ram tinah Pathian thu ring lo zingah te an darh a, an jawng hre lova Grik jawng hmang zawk an lo tam ta a. Chungho hman tur chuan Aigupta ram Alexandria khuaah Grik jawngin an letling ta a, a hmangah **Septuagint** an vuah a. Mi 72 lehlin niin an sawi a, Juda lehkha thianho chuan an hmang ber a, anmahni Hebrai jawng an hriat

loh avangin an chelek ber a ni ta a. Mi then-khat chuan Aigupta lal Ptolemy Philadelphusa'n Alexandria lehkhabu ina dah atana lehlintir a ni, an ti. Isua pian hma kum 286 vela lehlin a ni a. Isua dam lai pawh khan hei hi a ni an hman ber chu.

Tin, 'Vulgate' tia kan hmuh thin hi, Latin tawnga lehlinna, tu lehlin nge, eng laia mi nge ni pawh hriat loh, Roman Kohhranin an hman ber chu a ni. Jeroma dam lai, Isua pian hnu kum zabi lina thlengin an hmang a. Kum zabi lina tawp lamah hian amah ngeiin Hebrai tawnga mi a letling a. Kum zabi sarihna chinah Pope Gregory I-in lehlinna dikah a pawm a, an hmang hlen ta a. Tun lai thlenga an hman ber chu, lehlinna hlui zawk kha an endik a, kum zabi 17-na lamah Trent Inkhawmpuiin hman tura an puan chhuah chu a ni.

Sap (English) tawnga Bible lehlinna hmasa ber chu A.D. 1290 velah a ni a, a letlingtu pawh hriat a ni lo. A.D. 1380 velah hian John Wycliffe, Siamthatna Varparh Arsi, an tih chuan Vulgate-a mi a letling a. Chutih lain khawl chhutna a la awm loh avangin a harsa em em a. Mi tin chhiartir pawh a theih loh achha a ni. Chutih lai chuan Thuthlung Thar man ngawt pawh £ 40 (India tangkain Rs. 560 vel) a ting. Heti tak hian harsa mah

se, min Bible chhiar an tum hrâm hrâm a. A chhiar apiangte chu Sakhaw lam leh vantlang nun dan lamah an lo harh thar a. Roman Kohhran leh an hotute dik lohnate chu Bible êngah a lang ta a. Hei hi Roman Kohhran tan chuan a hnawk ta hle mai a. He Bible tibo tur hian House of Lords-ah thu an thehlut a. Mahse Duke of Lancaster thu avangin chu thu chu a puitling ta lo. Chu hlawh-chhamna chuan Wycliffe thiante chu Bible dik taka letling turin a tihuai ta zâwk a. Mahse kum 1408-ah Oxford khuaah Inkhawmpuîin thupêk an siam ta a, "Tumahin Sap tawnga Bible lehlin loh tur, Wycliffe lehlin sa pawh phêk teah emaw, bu teah emaw ziaka chhiar loh tur", tiin. Hei hian tihduhdahna rapthlak tak mai chu a thlen ta a. Sap tawnga Bible an chhiar avangin thenkhat an hrem a, thenkhatin an thih phah ta hial a.

Kum engemaw laiah khan William Tyndalea'n Thuthlung Thar hi Antwerp khuaah Sap tawngin khâwlah a lo chhu ta a. Chung chu England lamah a theh darh a. Roman Kohhran tan chuan a hnawk leh ta hle a. London-a Bishopin a hmuh apiang a lei a, a hal ral zel a. Mahse a man chuan tam zawk an chhu ta zel a. Tihbo a tum chu tidarh zau tura tanpuitu a lo ni ra hlah va. Hei hi khâwla chhutna hmasa ber a ni.

Tin, A.D. 1535-ah Miles Coverdale chuan Bible pum hi Sap tawnga letlingin khâwlah a chhu ve leh a. Chu chu lalber Henry VIII hnenah an hlân a. Kum 1568 thlengin he lehlinna leh theh darhna hi a kal zel a. Chung lehlinna chu Bishop's Bible an vuah a. Kum 50 lai an hmang a.

Kum 1603-ah James I England lal a lo ni a. Bible awm hmasa chu dik lohnate a awm deuh avangin lehlín that leh tur a ti a. A letling turin mi 54 a ruat a. An thawh hmain mi 7 chu an thi emaw ni, an pha ta zâwk emawni, an tel ve ta lo va. Mi 47 chauh an ni ta a. Pâwl rukah an in-then a, lehlín tur chin an insem thliah a. Mi 10 te chuan Westminster-ah an thawk a, mi 8 chu Cambridge-ah, mi 7 chu Oxford-ah, mi 8 dangte chu Oxford-ah baw, mi 7 dangte chu Westminster-ah, mi 7 dang leh chu Cambridge-ah baw. Letlingtute hian harsatna an neih chuan a rama leh kha thiam tupaawh râwn thei turin thu a pe a. Pâwl tinin anmahni pualin an letling theuh va; chu chu an endik a, a inan tlân vek chuan dikah an ngai a. A vaia an endik a, pawm tur bera an ngaih kha pakhatin a chhiar a, mi dangin Hebrai te, Grik te, Latin te, Spain te leh French tawng te an lo keu va, a dik lo lai apiang siam tha zelin an zo va. Kum 1607-ah an tan a, kum thumah an zo chauh a ni. An lehlín zawhin bu

3 chu London-ah an thawn a. Mi 6-in an lo endik leh a; chu mi zawhah Dr. Smith leh Dr. Bilsonan an endik leh a. Kum 1611-ah London-ah Robert Barkeran khâwlah a chhu ta a. He lehlinna hi Authorised Version an vuah a. Tun thlenga English Bible lâr ber chu Authorised Version hi a ni.

R.V. : He lehlinna hi tawng hman thua phei chuan a tha em em mai a. Amaherawhchu thu thenkhatte leh châng thenkhatte chu Pathian Lehkhabu ziaktute kutchhuak a ang lo hle mai a. Hman lai lehkhabu chu kut ziaak vek a nih avang-in a ziaak chhâwngtute khan ziaak sual emaw, ziaak hmaih emaw an lo nei ngei thin. A sual tawh en chung a ziaak chhâwngtu chuan tihsualna dang eng-emaw a han neih belh leh a, a nakinah phei chuan ziaak sual a tam ta hle thin. Chuvangin A.D. 310 khan Antiokei khuua mi Luciana chuan a endik a, a endik chu Kohhranin an ring ta a ni. Chu mi bu a tang chuan Authorised Version hi lehlin a ni.

Luciana endik hian ziaak dik lo a tam tawh khawp mai a, a tidik sêng lo va. Tun hnuah hian hman lai Pathian Lehkhabu Lucian a tih dik lohte tam tak chhar khawm a ni a. Chung a tang chuan ziaak chhâwngtute hian khawi lai laiah nge an tihsual thin tih a hriat theih viau. Tichuan

chung lehkhabu hluite hmang chuan Pathian Lehkhabu ziahtute kutchhuak ni ber âwm fiah tak-in a lo lang thei. Chu mi hmang chuan 1881 khan Sap tawng lehlin hi an lo endik ta a, 'Revised Version', an vuah. Pathian Lehkhabu zirtute chuan hei hi an hmang ber. He mi hmangin Mizo tawng pawh lehlin a ni, Grik tawng nen tehkhin zela lehlin a ni a, a dik tâwkin a rinawm em em a ni. Authorised Version ai pheichuan a dik zawk a ni.

Eng vangin nge Bible hi an ngaihhlut a, an serh em em bik ? Enginng chawisâng a, mi ril-ruah thu neihtir ? A chhânna chu hei hi a ni : **Tthlarau thâwkkhum** a ni. **Tthlarau thâwkkhum** a nihna chu chhan pahnih a awm a ni : Pakhat-na chu, **Pathian inlârna** ziahtute khâwmna a nih a-vingin. A pahnihna chu, a ziahtute hian **Tthlarau** hruaia an ziahtute avangin. **Mihring hnena Pathian inlârna leh Pathian hriatna** thang zel chu a chuang a. Zawlnete leh mi thianghlimten **Pathian hriatna lo zau tial tial**, Isua Krista in-chhâng khâwm chu an ziahtute avangin **Tthlarau thâwkkhum** a ni tih chu phat theih a ni lo.

Tthlarau thâwkkhum tih fiahna chu heng hi an ni :-

1. **Pathian inlârna** a chungnung bik. **Sakhaw dang lehkhabu**, heng Koran te, Veda tea **Pathian**

inlârna chu an zîmin an Chiang zo lo va. Bible-a Inlârna erawh chu a zau zâwkin a Chiang zâwk a ni.

2. Mihring nun dan leh awm dan a khawih bik. Coleridge chuan hetiangin a zia : "Leh-khabu dang ka chhiara ka hmuh chhuah aia Bible ka chhiara ka nun dan lailangtu a tam zawk".

3. A tumna leh a thupui a inpumkhat bik. Hun leh hmun leh mi hrang hrangte zia ni mah se, a tum ber, Tlantu leh a tlanna thu hi a inang vek a.

4. Sakhaw dangte a tidanglam thei. Sakhaw tinah Pathian a awm ngei tih hriatna awm mah se, an Chiang tâwk lo va. Bible hian chutiang Pathian hriatna chu a siamthain a tidanglam thei a ni.

5. Mihring nun dan a chawisâng bik baw a ni. Bible hi tawng hrang zaruk aia tama lehlin a ni tawh a. Bible chhiarna ramah chuan mi mal nun te, vantlang nun te, hnam pum nun dan te a lo sâng tial tial thin. Pathian thu chu, "Ke atan khawnvar a ni a, kawng atan êng a ni". Mi rilru te a tihên thin avangin nun dan sâng zâwk an hmu a ni.

Zana khawnvar êng angin,
 I thuin rilra a ên;
 Ro tha ain a hlu êm, e,
 Thinlungah ka vawng ang.

Thlarau thâwkkhum a nihna dan chu kan sawi ta a. Amaherawhchu Thlarau thâwkkhum kan tih hian, ngaih dan dik lo tak kan nei ang tih a hlauhawm a ni. Mi thenkhatin Luka hian Chanchin Tha a ziak laiin, a kut chu Pathianin a rawn hmang a, a ziak ta zat zat mai ni âwm-in kan ngai thei; chutiang êmin ngai lo mah ila, thenkhat chuan Luka rilru zawng zawng hi Thlarau chuan a nei a, a rilruah ziak tur chu a lo lang uar uar a, a lo lang ang ang chuan a ziak ta ni turah kan ngai thei e. Mahse chutiang zawng a ni lo. Mihringin lehkhah an ziak ang bawh hian a ziak ve a ni. Marka ziak pheih chu tam tak a la chhâwng a. Marka hian thil thenkhat a hrihfhah lohte pawh a hrihfhah thin. Isua chanchin tam tak ziak loh a nei ang, a ziak chhunte hi Pathianin a chhia leh tha hriatna hmang tura, a hriat fiah avanga a ziak a ni a, a ziak lohte chu jula a hriat loh vang a ni. Jothana chuan thil, dang ziak tur a hre teuh mai; mahse a chhiartuten an rin chuan, chatuana an nun theihna khawp chauh a ziak a ni.

BUNG II

PATHIAN

Ram tin leh hmun tina mihring awmnaah phawt chuan, Pathian a awm tih hriatna hi a awm zel a. Milem biate sakhuaah pawh thu dik inphûm nget tlat a awm a; chu chu Pathian a awm tih hriatna hi a ni. Mihring chu Pathian anpuia siam, Pathian thawa tih nun a ni a. Sualah tluin a Pathian anna chu tihchhiatin awm mah se, sualin a tihchhiat loh chi a awm a; chung chu, ngaihtuah theihna te, mahni inhriatna te, chhia leh tha hriatna te leh duh thlanna te hi. Heng Pathian anna la chhe ve lote hian Pathian êng chu a man a, chiang takin emaw Pathian a awm tih a hria a; chuvangin engemaw ti talin Pathian a ngaih dan chu a lo thang lian thin.

Pathian a awm ngei tih min hriattirtu chu pahni an ni a.

I. Sakhua :

(1) Mi, sakhaw ngaihsak mi a lo nih chuan, a chhia leh tha hriatnain mawhpurhna lian tak a neihtir a. A nun danah tha a awm emaw, suala awm emaw a inhria a. A sualna mawh emaw, a felna chhuan tlâk emaw chuan mi dang, chungte avanga a chungga thil tha leh tha lo thlen theitu awm ngeiin a hria a, chu tak chu Pathian ani.

- (2) Ram tinah sakhua a awm avangin, a neitu, chibai bûkna dawngtu a awm tih a hriat theih.
- (3) Kristian Sakhuua Isua Pathian ropuina êng inlârna chuan mîn hriattir.

2. Ngaihtuahna aţanga hriatna :

- (1) A chhan emaw, awmtirtu emaw. Thil awm rêng rêng hian awmtirtu a nei vek tia kan chhui zelin, hriat phâk lovah chhui luh theih a ni a; thil awm zawng zawng awmtirtu, a tâwpa awma chu Pathian chu a ni.
- (2) Khawvel leh a chhunga awm zawng hi tam tak, awm mai mai lova che vel vek an ni a. An in-tichhe lo va, an indâl hek lo va, mawi takin an che theuh va. Chu chuan chelhtu leh khai dingtu a nei tih a entir a; chu chu Pathian a ni.
- (3) Ruahmanna : Thil siam tinreng hi dah mai mai leh awm mai mai an ni lo va, fel taka siama rem khawm an ni. Chungte chuan tum pakhat neiin fel taka engkim ruahman vek a ni tih kan hre thei. Chung thil ruahman feltu chu Pathian a ni.

THUTHLUNG HLUI SAWI DAN

1. Pathian chu siamtu a ni. Lei leh van siam thu hi hman hnhah kan himu : Gen. 1:1-2:3 leh 2:4-25-ah te. Mêng chângte hian awm zawng zawng siamtu chu Pathian a nihia mîn hrilh a ni.

2. Pathian chu Mi nung a ni : Pathian chu thilththeihna inhlâwm khâwm, thil tichhe thei a, rite pawh siam thei ang mai hi a ni lo va. Mi nung, 'Keimah', ti thei leh titu thin chu a ni a. Kawlphe chaknate chu chak hle mah se, mi nung a ni lo va, chakna mai a ni a. Thuthlung Hlui Pathian erawh chu Mi nung a ni a, a jawnga, a inlâr a, mihringte thu awihna a phût a. Isa. 45:6.

3. Pathian chu pakhat a ni : Hnam tin z'ngah pathian pahnih pathum an bia a. Israelte Pathian erawh chu pakhat chauh a ni. "Keimah lo chu Pathian dang an awm em ni ? pakhat mah ka hre lo." Isaia 44:8. Jeremia chuan, "Lalpa chu Pathian tak a ni a, Pathian nung a ni a, chatuan Lalber a ni. Lei leh van siam ve hlei lo pathiante chu an la boral ang", Jeremia 10:10.

4. Pathian chu Thlarau a ni : Mihringte anga ngaihtuahna te nei a, kut leh ke nei âwmin ngaihtuah thin mah ila, Pathian chu thlarau lam mi a ni a. Thlarau lam thil, biak danah te hian a lungawiin, a lungawi lo thei a. Milem biakna hi châwl lova a leido ber a ni. Exodus 20:4, Deut. 4:15ff, Isaia 40:18ff.

5. Danglam thei lo Pathian a ni : Englai pawhin a pangngaiin a awm reng. Malakia 3:6, Heb. 13:8.

THUTHLUNG THAR SAWI DAN

Thuthlung Hlui leh Tharin Pathian an sawi dan tlein a danglam deuh. Thuthlung Hlui chuan Pathian chu Siamtu leh mihring chu a thil siam mai niin a sawi a. Thuthlung Thar erawh chuan Pathian chu Pa ang leh mihring chu a fate angin a sawi a. Kan Lal Isua zirtir dan chuan, Pathian chu ama Pa leh ringtute Pa leh mi zawng zawng Pa angin a sawi a. (Johana 20:17, Matthaia 5:45). Isua chu chatuan atanga Pa Fapa a ni a, ringtute erawh chuan fa nih theihna atangin fa nihna an chang chauh a ni. (Johana 1:12,13, I Johana 3:1). Mi zawng zawng fa nihna erawh chu an chung a ni chhuahtir a, ruah sùrtirin a enkawl hian a zirtir a ni. Mihring chuan Pathian hmangaihna a dawn hunah a fa nihna chu a tak takin a chhawr a. Fapa tlan bo chuan a pa kohna aw a hriat hma chuan fapaah a inchbiar ngam tawh lo va, a beisei ber chu, 'a pa ina inhlawhifa pakhat anga siam' chauh a ni. A pa erawh chuan a fapaah a la ngai reng a ni. Pathian kohna aw an hriat a, a kuta an tlók loh hunah an fapa nihna chu a chang thin.

Pathian chu pa ofah a ni lo va, Lalber, ram neitu a ni bawh a ni. "Ram pek che u hi in pa lawmzawng tak a ni." Luka 12:32.

Apostol Johana ngaih dan chu a danglam deuhvin a famkim deuh.

1. Pathian chu Thlarau a ni. Johana 4:24.
Thlarau a nih avangin tuman an hmu ngai lo. Johana 6:46.
2. Pathian chu êng a ni. I Johana 1:5.
3. Pathian chu hmangaihna a ni. I Johana 4:8.
4. Pathian chu chatuan nunna a ni. I Johana 5:20.
5. Pathian chu, (a) Isua Krista Pa a ni. Johana 17. (b) Mi zawng zawng Pa a ni. Chanchin Tha palinaah hian Pathian Pa nihna thurûk chu a inzam chhuak a ni. "Pathianin khawvel a hmangaih em em a." Johana 3:16.

Miin fa nihna a chan a, a hriat hmain thlarau lam tihdanglamna a kal tlang tur a ni; chu chu Pathian hrin a ni tur a ni. I Johana 3:9. Nunna tih hian, Pathianin a nunna min pe vein, a thawa tihnun kan nih a entir. Êng chuan thianghlamna, sua! hlih thim loh a entir.

Paula lehkha thawn lamah chuan a lan dan a dang leh deuh baw a —

1. Isua Krista Pathian leh Pa. 2 Korinth 1:3, Ephesi 1:3

2. Pathian ropuina êng leh Pa hmel chu Kristaah a lo lang. Kolossa 1:15, 2 Korinth 4:4 Isua chu Pathian anpui a ni a. A hnathawh chu Pathian hna a ni.
3. Chanchin Thaa Pathian ram chu Paula leh-kha thawn lamah chuan Kohhran leh chhungkuain a thlâk a. Pathian chu chhungkaw hotu a ni.
4. Pathian chu mi zawng zawng Pa a ni. Eph. 3:14ff.
5. Pathian khawngaihna tih hi Paula uar ber pakhat a ni a, Pathian hmangaihna athlâwna mihring hnena lo thleng hi a ni. Khawngaihna hrilhfiahna tha ber chu, Isua tisa channa hi a ni.

KHAIKHAWMNA

Pathian chuan engemaw ti zâwng talin mihring hnena inbriattirna a nei thin a. T.T. 14:17. Inbriattirin, inlâr thin mah se, hriat kim rual a ni lo tih hi hre reng ila. Joba 11:7-ah chuan "Pathian chu a zawnin i zawng chhuak thei em ni? Engkimtithia chu i hmu chhuak zo em ni? Van angin a sâng a, engnge i tih theih? Mitthi khua ala thûk a ni a, engnge i hriat theih?" tiin a ziaak a. Rom 11-ah pawh chutiang thu a awm a; mahse Pathian chu hriat theih a ni lo,

a tihna a ni lo va, hriat kim zawh a nih lohzia a sawi mai a ni. 'Bung tam tak leh kawng tin-rênga a inpuanna' avangin a then chu kan hre thei. Hmuh theih loh Pathian anpui Isua chu kan Pathian hriat theihna sâng ber a ni. Pathian chuan kan ngaihtuahna sâng ber pawh a khûm a ni tih hi i hre reng ang u. "Thil inthupte chu Lalpa kan Pathian ta a ni a, thil puan chhuahte chu chatuana keimahni leh kan thlah-te ta a ni" Deut. 29:29.

1. Pathian chu chatuan mi a ni : Chatuan tih hian bul leh tâwp nei lo a entir a. Hei mai hian Pathian chatuanna chu a hrilhfiash zo lo vang. "Ka nih chu ka ni," (Exodus 3:14) tih hian, chatuana tuma siam loh, mahnia awm a nihzia a kâwk a. "Abrahama awm hma pawhin ka awm," (Johana 8:58) tih te leh "Lal-ber, chatuana awm," (1 Timothea 1:7) tih te hian a tan hun bi a awm lo - chatuan mi a ni tih an tilang ber.

2. Pathian chu siamtu a ni : Genesis leh Isaia buah thil siam thu hi kan hmu a. Pathian chu Siamtu leh thil siamte inngahna leh neitu leh chelh dingtu a ni. Kolossa 1:16-17.

3. Pathian chu Thlarau a ni : Awm tawha leh Awmmêka leh Lo awm tura chu a ni.

Hmun tinah a awm a, engkim a hria a; hun leh hmun leh thilin a dâl thei lo. Thlarau tih hi hrilhfiáh tak tak a har hle ang. Khawvel thil (material) ni lo hi thlarau lam chu a ni; mahse mi nung a ni ngei tur a ni.

4. Pathian chu Mi nung mi ze nei a ni : Mi ze nei nunna chu, nunna sâng ber kan briat phâk chu a ni. Hnim te leh ran te leh mihring nunna te tehkhin ila, Pathian mizia leh Mi nung nihna chu tlemin kan hre thei deuh vang. Pathian chu mi ze neia k n sawiin, a nung a, a ngaihtuah a, a hria a, a hua a, a hmangaih a, a duh a, tihna a ni. Inpawlhona tih hi a hrilhfiáhna remchang tak a ni.

5. Pathian chu kan Pa a ni : Pa nihna chuan Siamtu nihna, Lal nihna, Tlanna leh Enkawlna a huam vek a. Genesis 1:27-ah chuan, "Pathianin Ama anpuiin mihring a siam a, Pathian anpui ngeiin a ni a siam ni; mipaah leh hmeichhiaah a siam a ni," tiin a ziaak a. Pathian anpui chuan mipa leh hmeichhia a huam a ni. Pathianah chuan mipa leh hmeichhia a inchhûng khawm a ni. Pathian Pa nihna kan sawiin, Pathian Nu nihna kan theihngihl tur a ni lo ve. Nu a nihna chu (a) fate enkawl danah leh (b) an tan a inpek zawnaafi a tang a. *Johana 3: 16; 15:13.

PATHIANA THIL AWMTE (Attributes)

Hengah hian kan țawmpui theih leh theih loh chi an awm a.

1. Kan țawmpui theihhte : —

- (a) Thatna
- (b) Dawhtheihna
- (c) Rinawmna
- (d) Thianghlimna
- (e) Ngilneihna
- (f) Hmangaihna
- (g) Felna
- (h) Finna

Thlarau rahte Gal. 5:22 en bawk ni se.

Heng hi thenkhat chu Pathian Thlarau hna-thawh ațanga kan neih theihhte an ni.

2. Kan țawmpui theih lohte :-

- (a) Engkim tih theihna
- (b) Engkim hriat theihna
- (c) Khawî kipa awm theihna
- (d) Chatuan mi nihna

Pathian thatna leh țihbaıawmzia chu dah hrana inkalh anga ngaih tur a ni lo va, a hman-gaihnaah a inngat ve ve a. Fel leh mi khaw-ngaih thei a nih awangin, sual chu a huain a hrem a; chu chuan a hmangaihna a lantir zawk a ni.

BUNG III

ISUA KRISTA

Isua Krista chu Pathian thu (Theology)-ah hian a laipui ber a ni. Pathian thu hre tur chuan Isua hriat hmasak a tul a ni.

1. Isua chu Kristian Sakhaw laipui a ni :
Kristian Sakhua chu Krista a ni mai a. A siam chhuaktu chung a inngat Sakhua a ni. Mohameda hre hauh lo pawh Mohamed sakhaw bia-in mi a intulut thei. Budha hre hauh lo pawh Budha zuiah mi a awm thei. Isua Krista hre hauh lo chu tumah Kristian an ni thei lo.

2. Isua chu Thurinah a laipui ber a ni :
Kristian Thurin kan tih hian, Pathian, Thlarau Thianghlim, Isua, Mihring, Sual, Tlanna leh Rinna a huap a. Heng hi hre tur chuan Isua nihna leh a hnathawh hriat a tul a ni. "Nang-nin tunge a ni mi tih?" Hei hi zawhna pawimawh tak mai a ni. Petera chuan, "Krista, Pathian nung Fapa chu i ni e," tiin a chhang a. He chhanna hi tha mah se, a kim tawk lo va. Mihring kim nge a nih, Pathian kim? A nih leh mihring leh Pathian a ni kawp em ni? Hei hi chhang fel a, Isua nihna hre tur chuan, Pathian Leikhabu zirtirna rawn a tul a ni. Isua chu tunge a ni an tih?

CHANCHIN THA PATHUMTE CHHÂNNA (Matthaia, Marka, Luka)

1. Pathian Fapa : He hming hi zirtirten Isua hming atan an hman a ni a. Baptisma a chan lai leh a hmel danglam laiin van ațanga awin, "Ka Fapa," arawn ti bawk a. Tin, ram-huaite khan an hman bawk a. Kan Lal Isua erawh chuan amah a inbel lêm lo va, mi dang-ten an hman chu a hnial lêm hlei lo va. Matthaia 8:29; 14:33; 26:63; 27:54. Ama chanchin a sawi chuan Pathian Fapa ang chuan a insawi bawk thin. Pathian pawh 'Ka Pa', tiin a lam bawk thin. Pathian nen an inbulzia leh an in-pumkhatzia a entir.

2. Mihring Fapa : Chanchin Thaah he hming hi wawi 81 kan hmu a. Isua ngei pawh-in a invuah bawk a. Mi dang, Isua hming atana hmangtu chu Stephana chauh a a ni. T.T. 7:56.

(a) He hming hi khawi ațanga a hmuh nge? Thenkhat chuan Enoka bu-a mi niin an ring a. Thuthlung Hluiah chuan Sam 8-ah hman a ni a. Ezekiel a bu-ah wawi tam tak a lang bawk a. Daniela 7:13-ah hman a ni bawk. He Daniela bu-a mi hi a chhawm chhuah a ni thei e.

(b) He hming hi a awmzia engnge ni ? Then-khat chuan Isua mihrinna dik tak leh famkim entirna niin an ring a. Mi dangin mihring chak lohna entirna niin an ring a. Mi dang leh chuan Isua mihrinna entawn tlâk entirna niin an ring a. Mi dang leh chuan Messia a nihzia entirna niin an ring a.

(c) Thuthlung Hlui leh Thar inkâra lehkhahuah te chuan Messia sawi nan an hman tawh. Chu chu Lal Isuan a chhawm a ni ang e.

He hming a hmanna bung leh chângte hi hmun hnihah then ila, tlêmin a awmzia hre tur-in min tanpui thei ang.

(i) Leia a hnathawh lam hawia a sawina — a tuarna leh a thihna lam entirna : Marka 2:10; 8:31; 9:31; Matthaia 8:20; Luka 19:10. Heng hi chhinchhiah teh : “Mihring Fapa chu rawng-bawl saka awm tura lo kal a ni lo,” tih leh, “Mihring Fapa chuan thil tám tak a tuar tur a ni,” tihte hi.

(ii) Ropui taka lo kal lehna lam hawia a sawina : Matthaia 25, LK. 17:24, MK. 8:38.

Heng bung leh chângte hian Isaia bu-a Pathian chhiahhlawh (Isaia 53) leh Pathian Fapa Messia ropuina chu a hmer kawp a — Kraws leh Lallukhum chu. Tlannain mihring leh Pathian a zawmzia a entir.

Apostol Johana lehkhavute : Johana Chanchim **Ṭha** bu chu, “Isua chu Pathian Fapa a ni tih kan rinna tur leh kan rin avanga a hminga un kan neihna tura zia” a ni a. Joh. 20:21. Pathian Fapa tih leh chatuan nunna tih chu a thupui ber a ni a. Tin, Krista chuan chatuan nunna petu ni turin heng nihnate hi rawn puin a sawi a :

1. **Mihrinna** : Heng hi a mihrinna lantirtu chu an ni. :—

- (a) Jakoba tuichhunchhuahah a hah a, a ṭhu. 4:6.
- (b) Lazara thlânah a ṭap. 11:23.
- (c) Kraws chungah a tuihâl. 19:28
- (d) Mo lawmnaah a tel ve. 2:1-12.
- (e) A nu a ngaihtuah. 19:26

Mihring a nih avangin engkimah Pathian a rinchhan a :—

- (a) Pathian hnenah a ṭawngtai. 11:41
- (b) Pathian tirh a ni. 10:36
- (c) Pathian hna a thawk. 5:19

Mihrinna kim chuan, mihring ai a awh zo tâwk a ni.

2. **Pathian Fapa nihna** : A hming langsar ber chu Pathian Fapa tih hi a ni a. A Fapa nihna chu chatuan ata a ni a, 1:1; 17:5; 8:32&58. “Abrahama awm hma pawhin ka

awm," tih hi ngaihtuah teh u, Pathian tan hun bi a awm lo va, 'Ka awm tawh,' ti lovin, 'Ka awm,' a ti mai a ni.

Tun hma, tun hnu keinin kan ti,

Nangin TUN i ti fo.

Bung khatnaa **Thu** tihah hian Pathian tisa channa kan hmu a. —

- (1) **Thu** chu Fapa a ni a. 1:18
- (2) **Thu** chu chatuan mi a ni. 1:1
- (3) **Thu** chu engkim Siamtu a ni a. Êng a ni a, Nunna a ni bawk. 1:3-4.
- (4) **Thu** chu kan zingah a lo awm a, tisa arawn pû a. Pathian ropuina leh Pathian hmel tilangtu a lo ni ta. 14:9.

Thil dang a ni lo **Thu** kan tih hi,

Krista Isua nggi kha a lo ni;

Mi rilru thuin a chhuak angin,

Pathian rilru a lang - Kristain,

KOHRAN HMASATE NGAIH DAN

Tirkhohte Thiltih bua kan hmuh angin Isua chu

1. Pathian angin chibai an bûk.

2. Thuthlung ~~Mia~~ ~~dehva~~ ~~chauhvin~~ a put 'Lalpa' tih chu Isua an bel, 1:21.

3. An Rorêtu a nih hre rengin a hnenah an tawngai, 7:69 (Stephan); 9:14, 21, 22:16.

Petera Sermon-ah chuan heng hi kan hmu thei:

1. Isua chu thiltihmakin Messia a ni ngei tih Pathianin a tilang, T.T.2:22.
2. Pathianin mitthi zing ata a kai tho va, a ding lamah a chawimawi ta a, 2:32.
3. Pathianin Lal leh Krista ni fâwmin a siam ta, 2:36
4. Khenbeh a, chawimawia awm leh tawh Isua chu mihring Chhandamtu a lo ni ta, 4:12.

PAULA NGAIH DAN TLÂNGPUITE

A. Isua Lalna :

1. Paula chuan a pian thar aţangin Isua chu Lalpaah a pawm nghal a, T.T. 9:5
2. Kristiante Thurina a lai pui ber angin Isua lalna chu a ngai a, Rom 10:9. I Kor. 12:3. Philippi 2:11, 2 Korinth 4:5.
3. Krista lalna chu chawimawia a awmnaah hian a lang a ni, Philippi 2:9,11.
4. Kohhrana an lo tel avangin hnam tin tan Lal a ni, I Korinth 2:8.
5. Krista lalna chuan a Pathianna leh a cha-tuan mi nihna a tilang.

Isua hi Lalpa a ni tih hi Judate tan pawm a harsa hle. 'Jehova i Pathian hming anaranin sawi sub,' tih thupêk kha an tih em em mai.

Pathian lehkhabuah pawh Jehova hming lo chuang sela, an chhiar ri ngam lo, a hming lam aini LALPA an ti thin. Mizo tawng Thuthlung Hluia hawrawp liana LALPA tih awmna tawh phawt hi, Jehova hming chuanna chu a ni. Isua LALPA a ni tih chu, Jehova a ni tihna a ni. Chatuan Pathian, thil engkim Siamtu chu.

B. Adama pahnihna a ni: I Kor. 15:22,45.

Isua chu nunna petu anga a hriatna chuan Adama pahnihna angin a ngaihtuahthir a. Hetingin a tehkhin a :-

ADAMA HMASA

1. Thihna.
2. Mi zawng zawng an thi.
3. Mi nung a lo ni.
4. Lei mi a ni.
5. Mi sualte lû a ni.

**ADAMA HNU-
HNUNG**

1. Thawhlehma leh nunna.
2. Mi zawng zawng tibnun.
3. Nunna Petu Thlarau a ni.
4. Van mi a ni.
5. Mihring tharte lû a ni.

Lei mi, tisa, sual leh thihna ai chuan, Van mi, Thlarau, Nunna chu a chak zawk avangin a roreina chuan sual thuneihna chu a hneh ang a, thihna chu tihbovin a la awm ang. Aw thihna, khawnge i hnehna ? tia au khum a la ni ang.



C. Isua Fapa nihna :

Fapa tiñ hian, chhung lama Pathian ^{nen an} inzawmna a entir a; hengte hi a tilang hawk.

1. A Pathianna.
2. A chatuan mi nihna.
3. A hnuaihnun zâwkna. 1 Kor. 15:28.

A thawhlehnain Pathian Fapa a nih a entir a. Isua chu mihringah a lo piang a, Messia a lo ni a. Pathian Fapa a nihna erawh chu 'a lo ni,' a ni ve lo va, chatuana a nih sa a ni. Rom 8:31, 1 Kor. 1:9, Galatia 2:20, Kolossa 1:13, 15-19, 2 Korinth 4:4, Phil. 2:5-11.

A chatuan mi nihna chu hmun tam takah kan hmu thei a. Galatia 4:4, 1 Kor. 10:4, 2 Kor. 8:9, Phil. 2:5-7. Isua chatuan mi nihna hi tam takin sawi bo an tum a, Lal anga an pawm si chuan lalna chuan a chatuanna chu a huap tel si a ni.

A hnuaihnun zâwkna chu hengahte hian hmuh theih a ni : Galatia 4:4, Rom 8:32, Phil. 2:9, 1 Kor. 11:3, 3:23, 15:28. Pathian thu thiam thenkhatten he thu hi leia a awm chhung thu maiah an sawi a. Mahse Bible chuan chatuan atanga a nihna leh a thawh leh hnua Pathian ding lama chawimawia a awm hnua pawh a hnuaihnunna hi a la zirtir zel a ni.

HÉBRAITE HNENA LEHKHA THAWN-

ah chuan, Isua chu Puithiam niin a lang a. Chu chu a bu chhung thupui ber a ni.

1. A Puithiamna chu Pathian hnena a hmuh a ni. 5:4,5.
2. A Puithiamna chu chatuan a ni. 7:17,21.
3. A mite zinga mi a nih avangin, an sualna leh tuarnaah te a lainatin a tuarpui thei, thlêmna tâwkte pawh a tuarpui thei a ni. 4:15, 5:1,2.

THU PUAN BU

Thil langsar tak he bua kan hmuh chu Beram No leh a tlansate an ni.

1. Isua chu Messia ngei a ni a. – Sakeibaknei Juda hnama mi, Davida bulpui leh a thlah Varparh Arsi chu a ni. 5:5, 22:16.
2. Beram No chu lelung pian hmam talhin a awm tawh a, – chu chuan a chatuan inthawina chu a entir. Thiltihtheihna te, Chawimawina te, Finna te, Lawm thu hrilhna te, Ropuina te hmu tlak a ni.
3. Alpha leh Omega a ni a, mitthi khaw chabi te a nei a. laite La! leh hotute Hotu a ni. 19:16.

BUNG IV

THLARAU THIANGHLIM

THUTHLUNG HLUI

Thlarau Thianghlím thu hi Thuthlung Hluiah chuan a lang tam lo hle a. A lanna awm chhunahte pawh Thianghlím tih hi a tel mang lo, Pathian Thlarau tih hi a ni mai zâwk thin. Chutih laiin Thianghlím tih hian chhung lam thatna (moral) lam hi a kâwk mang lo va, serh hran emaw, dah hran emaw hi a kâwk zâwk. Pathian Thlarau thua 'Thianghlím' a lo telna chu tlai khaw hnuah a ni a; chungah chuan chhung lam thatna pawh a phûtin, a huap zau ta zelin a lang.

Pathian Thlarau chu thil siam thua pawh hian a tel a. Tin, mi bikte hnenah rorêl thiamna te, finna te, themthiamna te, chakna leh huaina te a pe a. Thil bik leh tumna bik atan taksa lam thila hnathawktu, mite tanpuitu niin a lang ber. Genesis 1:2; 41:38, Exodus 23:3; 31:3, Numbers 11:17,25, 2 Samuel 23:2, I Lalte 22:24, Job 32:8, Ezekiel 11:5, Daniel 4:8, 5:11. Tin, taksa nunna bulpui niin a lang baw k a. Genesis 2:7, Job 33:4, 27:3. Chu Thlarau chu hmun tinah engkim hria leh hmuin a awm. Sâm 139:7ff.

Thuthlung Hlui mite thinlunga mahni inhriatna a thang zel angin, sual inhriatna a lo thang ve zel a. Chuta tang chuan Pathian Thlarau chu chung lam thatna leh thianghlamna nen hian inzawmna neilin a lo lang a. Sãm 51:11, Isaia 63:10, Zakaria 12:10.

Mihring rifru leh taksa lama a chêt vêt danah hian, Pathian leh Thlarau chu thlei hran a har ble a. Mahse chu harsatna chuan Pathian nen an inpumkhatna a lantir zâwk a ni. He Chanchin Tha hun atana Thlarau an hmuh lâwk dan chu, mi bik leh tumna bikah an hmu chuang lo va, mi zawng zawng chung a lo thleng turin an hmu zâwk a ni. Joel 2:28.

THUTHLUNG THAR

Hetah hian Thlarau Thianghlam chu chiang zawk leh zau zawk a lang a. Thuthlung Thar bu zawng zawngte hian an sawi lang vek a, Johana II&III-ah chauh a lang ve lo, Chanchin Tha pathumte hian Isua nihna leh a hnathawh chungah hian an sawi lang ber a. Lal Isua chu a hnathawh harsa puite leh a nun dan leh awm dana a thawn tute chu hneh zel turin a thuan a. Thlarau nena mpawmahn chung chu a hneh thin a. Baptisma a chan lain a awmpui a, Diabola a tawh dawnin Thlarauvin a hruai a. Ga-

lil-a a rawngngbawlna hmun chu Thlarau thil-
tihtheihna puin a pan a. Luka 4:14.

Ringtute chungchangah chuan, Thlarau an
la chan tur thu kan hmu a. Chanchin Tha
avanga rorêltu hmaa an din hunah pawh a la
dinpui a, an tân sawipuitu a la nih tur thu kan
hmu bawh a.

Johana Chanchin Tha buah chuan, Thlarau
Thianghlim chu pian tharna awmtirtu a ni a.
Thlarau dik tak, thutak zawng zawnga hruai
iüttu chu a ni a. Lal Isua thu sawite kha a
hriat chhuahtir leh a; chung thute chuan a thla-
muan a. Kohhrana Thlarau Thianghlim awm
chhung chu hun rei tak emaw, rei lo tê emaw
a ni lo va, 'chatuana awm tur' a ni. Kohhran
chu Thlarauvin a kalsan ngai lo.

Kohhran hmasate chuan nunna hnârah leh
huaisen nan leh ehak nan an hmang a. Hma-
sâng pasaltha sũhn̄u zui mai mai an ni lo va,
an Lapa chu a nung a, Thlarau Thianghlim
hman̄gin an zingah nungin a tel zel tih an hria.
Pawl engemaw ind̄m mai an ni lo va, Thlarau
Thianghlim tlingheh leh hman an nih an inhre
bawh a. T.T. 20:28.

Paula ngaih danah chuan Thlarau Thiang-
hlim chu Pathian chakna, kan mizia man a,

tidanglam a, Kristaa nun thar min petu chu a ni. Chu nunna thar avang chuan fa nihna chu kan chan kan inhre thei. Rom 8:15. Chuta tang chuan ringtu chuan Isua chu Lalpa tiin a puang thei a. Tichuan mihring thar nunna chu hmangaihna te, ngilneihna te, thatna te, remna te, thuhnuairawlhna te, insûm theihna tein a lo rah thin.

Thlarau Thianghlim chu Pathiana Mi pathumna, engkima Pathian nena inpumkhat, lâk hran theih loh chu a ni. Apostolte thurinah chuan, "Tin, Thlarau Thianghlim ka ring," tih a ni a. Thlarau Thianghlim awm ngeia rinna mai ni lovin, Pa leh Fapa chung a rinna nghata kan rinchan anga rin tur tihna a ni.

He Pathiana Mi pathumna hian mihringte hnena inlârna tur leh inentif nan thil hrang pasarih a hmang a. Pathian chatuan thu dik leh tak chu entirna lovin mihringin a hre phâk lo va. Mi finge chaub hriat phâk thu finge leh harsa Pathianin a hmang lo va, mi mawlte pawhin an hriat theih a hmang zawk thin a. I Kor. 1:21. Chung entirnat chu heng hi a ni : Thuro, Thu, Tui, Mei, Hriak, Chhinchhianna leh Zakhamna te hi.

1. **Thuro** :— Hnam tin tih theihin hei hi thianghlimna leh remna entir nan an hmang a. Tui lêt lai thuah te, Psalms buah te, Solomona lehkhabuah te chuan thuro chu faina, thianghlimna, mawina leh remna entir nan hman a ni a. Hmasâng Kristiante chuan Kut hi Pa entir nan an hmang a, Kros hi Fapa entir nan, Thuro hi Thlarau Thianghlim entir nan an hmang a. Lal Isua chung a lo chhuk khan, Lal Isua chu sual nei lo a ni a, Remna Lal Fa a nih a rawn puang a. Ama mizia ngei pawh chu a rawn tilang fâwm a ni. Tin, Thuro chu sava ti tak mai a ni a; chutiingin Thlarau pawh chu tihlungngaih theih a ni baw. Ephesi 4:30, Hebrai 10:29.

2. **Thli** :— Hebrai jawngah chuan thli tih leh thaw tih hi thuhmun a ni a. Grik jawngah pawh thuhmun an ni a, Thlarau tih nan hman an ni ve ve. Bible letlingtu thenkhat chuan Thlarau Thianghlim tih aiin Thli Thianghlim tih hi an duh zâwk. Genesis leh Ezekiela bu-a thaw leh thli chu Pathian atanga nunna lo chhuak, tisa leh ruh rote tinungtu chu a ni a. Genesis 2:17, Ezekiela 38:9. Johana bung thuma "thli a duh duhin a tleh thin" chu, Pathian Thlarau, mite suala thi tawh tinungtu chu a ni.

3. **Tui** : Chhiar tur : Isaia 44:3,4, Johana 7:37-39, Exodus 40:12, 31,32, Ephesi 5:26.

Pathian Lehkhaw tui lo lanna tam tak chu silfaina a ni a, chu mi hnuah tihharhna leh tihhlina a ni thin. Israel puithiamte chuan insil-fai dan thuah hnih an nei a. An hna atana koh an nihin silfain an awm a, tin, an ni tin hna an thawh dawnin, biak buk an luh dawn apiang-in an insilfai leh a. Pathian Thlarau chuan tui angin sual kai dumte a bual fain tihthianghlin-na hna a thawk a ni. Tin, tuihala chaute tun-nunna a ni bawh. Johana 7:37-39.

4. Mei : Genesis atangin Thu puan thlengin mei thu kan hmu a. "Mei khandaih vir tawn zawk zawk"-in a tan a, "Kata kang meidil"-in a tawp a. Abraham te, Mosia te, Gideon te leh Elija te hnenah Pathian chu meina inlar thin a. Israelte chu meina hruai a, Biak buk chu meina rawn luahpui a. Bible chuan, "Kan Pathian chu mi kan ral hmang mei a ni," a ti a. Parsees te chuan an pathian chu meina an entir a. Vedic-Hindute chuan an pathian chu mei 'agni' an vuah bawh a.

Mei chu lumna leh thlamana a ni a, enna a ni bawh a. Thlarau Thianghlin chuan ringtu chu tilamin a thlamana. An rilu ngui tihlim-in, an lungngaiina thin chin a hruai thin. Mei chu van atanga lo thin, Biak buk an tinung reng a. Ringtu chung a Thlarau Thianghlin

chu a nung reng tur a ni. Thlarau Thianghlim chu timit suh u. I Thess. 5:9.

5. Hriak : “Mi thianghlim hnen ata hriak thihna in chang a, engkim in hria a ni.” I Johana 2:20.

Hriak thih chu, thil bik engemaw atana ruat-na leh tihhranna a ni a. Lalte leh puithiam tur-te chu hna bik atan hriak an thih thin. Thlarau hriak thihna, ringtuin a chan pawh chu, rawng-bawlina hna bik atan a ni thin.

6&7. Chhinchhiahna leh Zakhamna :—

2 Kor. 1:21, 22, Ephesi 1:13, 14.

Chhinchhiahna chu himna leh humna a ni. Daniela tâna sakeibaknei pûk chu an chhinchhiah tlat a. Lal tsua thlân pawh an chhinchhiah tlat bawk a. A bo loh nana chhinchhiah a ni a, lo bo ta pawh ni se a chhinchhiahtuin ama chhinchhiahna ngei chuan a la zawng chhuak leh ang, tihna a ni.

Zakhamna chuan hnung lam ni lovin hma lam a hawi a ni. Pêk tawh ang ngelin la chhinzawm leh tur tihna a ni. Ringtuin Thlarau zâra himna te, lawmna te, Pathian nena inremna te, Pathian hmangallina a dawnte chu a zakhamna chauh a ni a, a tem lawkna chauh a ni.

*“Ka tem thán he loiah hian,
Yanah a zual zawk chu.”*

Chu a zakhamna tihfankimna tur chu thlirin ringtu chu a inthlamuan a, a intiharchin a intichak thin.

BUNG V

PATHIANA MI PATHUM.

Pathianah chuan Mi engzatnge awm?

Pathum : Pa leh Fapa leh Thlarau Thianghlim chu. An pathum chuan Pathian pakhat an ni a. An nihna leh thiltihtheihna leh chatuan-naa intluk an ni a. An zain chatuan Mi nung an ni.

Bible-a kan hmuh angin, Pathian chu Pa angin, thil siam thuah leh leilung leh a chhunga chêngte enkawl leh hruainaah a lang a. Fapa chu Chhandamtu leh Tlantu angin, mihringte an thiltih sual ata tlan chhuak a, chhamdamin a inlantir a. Thlarau Thianghlim chu tiansate enkawl a, tithianghlim a, thlamuanin leh chênpuin, Thlamuantu angin a inlantir a. Pakhatin a thawhin, a dangte chu an chawl mai lo va, an thawk tlâng zel a, pakhat an ni si a. Pa chu chatuan Mi, tuma siam ni lo, bul leh tâwp nei lo a ni a. Fapa chu Pa hrin a ni a. Thlarau Thianghlim chu Pa leh Fapa chhuak a ni a. Pakhatna, pahniha, pathumna anga sawi theih an ni a; mahac an intluk lohna tha a awm chuang lo. A pathumna chuan a dangte a tiupa zawk chuang hek lo. An zain chatuan Mi nung, Pathian pakhat an ni.

He thu zirtu chuan heng hi a rilruah vawng sela: Thing chu a zung a awm a, a kûng a awm bawk a, a zârte leh a rahte an awm bawk a. A zung, a kûng leh a zârte chu thing pakhat a ni. Mei chuan lumna leh satna a nei a, êna a nei bawk a, khu a nei bawk a. An pathum chuan tumah pailh lovin mei an ni a.

“Pathian chu hmangaihna a ni,” (I Joh. 4:8) tih hian, Pathiana Mi pathum thu hi a tichiang thei deuh a ni thei e. Hmangaihna chu Pathian chatuan Mi nunga chu a ni a. Thil siam chuan awm tanna a nei a. A hmangaihna chuan a hmangaih turte chu nghâkin, mihring siam hmân athlâwnin a awm lo va, chatuan aţangin Pa leh Fapa leh Thlarau Thianghlim chu an inhmangaih a ni.

BUNG VI MIHRING THUTHLUNG HLUI ZIRIRNA

Mihring siam thu hi hmun hnihah a lang a: Genesis 1:1-2:3 leh 2:4-3:24 te hi. A hmasaah hian, thil siam chu sâng tial tial a, mihringa tâwpin a lang a. A khawi khawiah pawh hian mihring chu thil siam dangte chung a mi a ni tih a lang a. Ziakna hmasaah hian mihring chu Pathian anpui ngeia siam a ni tih a lang a. A hnuhnung zawkah hian Pathian thawa tihnung in a lang baw a. Chung thu pahni chuan mihring chu (a) Thil siam chung a thunei tur leh (b) Pathian nena inpawho tura siam a ni tih a lang baw a. Thil siamte lal ni tura ama chi ngei, ama nunna ngeia a siam avangin a hnenah a chêng thin a. Tin, a hnathawh chhonzawmtu atana a siam an ni baw. "Chi thlahin lo pung ula, leilung hi luah khat rawh u."

Genesis 1:28.

Mihring chu vaivuta siam, Pathian thawa tihnung a ni a. A mihrinna chu, lei leh Pathian thaw infinkhawm a ni a, Ama anpui ngeia siam a ni. Chuvangin chhung lam leh thlarau lam atan than len theihna leh thiltihtheihna a pianpui a. Pathian nen inthian a, Amah annaa thang

lian zel thei a ni. Psalms 17:15. Tichuan Pathian kohna chhâng tur leh a duhzâwng ti thei turin, a duhthlanna chu phuar lohvin a zalen a ni.

Chutianga khawvel thil leh Pathian nunna inkawpa siam chu a nih avangin, a khawvel thil zâwk chu thi thei a ni a, a thlarau lam pang crawh chu thi thei lo a ni. Chuvangin chu mihrinna chuan Pathian a pâwl thei a; chu inpâwl-na chu thihna pawhin a tichat thei lo a ni. "I remruatnain min hruai ang a; chu mi hnua ro-puinaah min lo lâwm ang." Psalms 73:24.

THUTHLUNG THAR ZIRTIRNA

Thuthlung Tharin Pathian a ngaih dan chu a ropui zâwk a, a sâng zâwk angin, mihring a ngaih dan pawh a sâng zâwkin, a ropui zâwk bawh a ni. Thuthlung Hluiah chuan mihring chu Pathian 'anpu' a ni a, Thuthlung Tharah crawh chuan 'fapa' a ni ta zawk a. 'Fapa' vuah ni mah se Pathian fa ni saa piang kan ni lo va, fa nih theihna atanga kan chan chauh a ni. "Amah lawm apiangte hnenah chuan an hnenah Pathian fate nih theihna tur a pe, a hming ring-tute chu." Johana 1:12. Mihring chu Pathian mithmubah chuan a hlu em em a, mihring hlut-na chu isua tisa channa leh tlannain a tilang a ni. Mihring chu tlan chhuah tlâk leh tlan chhuah

theih a ni tih kan hre thei baw. Mihringa Pathian êng chu sualin a timit lo va; chu chuan Pathian nen a hzawmtir a ni. Johana 1:9.

Thuthlung Thara mihring lan dan chu thil pathum inkawp khawm niin a lang ber, thlarau leh rilru leh taksate chu. I Thessalonika 5: Taksa thuah hian ngaih dan chi thum a awm a. Grikte chuan taksa chu thlarau lung in tâna emaw, sual bu khuarna emaw angin an zirtir a. Kan Lal Isua erawh chuan taksa a rawn put avangin, sual inghahna bulah a ngai lo va, sual luhna erawh chu a ni zâwkin a ngai tih a lang a. Pawla chuan sualna briamhrei a ni tih a zirtir baw a. Kan Lalpa Isua ngaih danin, taksa chu kan mihrinna bung khat a ni a, a thlarau lam pang erawh chu a sâng zâwk a; chu ngaih dan tawmpaitte chuan, a tulnaah chuan an taksa chu khandah leh kraws tâwk tur pawhin an phal thei a ni. Matthaia 23:24.

Paula zirtirnaah chuan heng hi kan hmu a :-

1. Taksa chu Pathian in a ni a. I Kor. 3:16.
2. Taksa chu sual thutphah, a bu khuarna chu a ni lo na a, sualna briamhrei atana hman theih a ni a, felna briamhrei atana hman theih pawh a ni baw. Rom 6:12.
3. Taksa chu mihring bung khat a nih avangin Kristian a tian tel ve. Rom 8:23.

4. Hring lam taksa a awm angin thlarau lam taksa pawh a awm a. Tawih theia tuh, tawih thei lova kaih thawh chu a ni.
5. Tho leh taksa chu, a chênputu Thlarau azâra kaihthawha tihnun chu a ni. Rom 8:11.
6. Paula hian taksa tih leh tisa tih hi a thliar hrang. I Kor. 15:39,40. Tisa tih hian mi-hring châkna te, chak lohna te a kâwk bik a, kan tisa mal mal, ruh te, vun te leh thil dangte. Taksa tih hian a mihring pum puia kha a huam a ni. Paula zirtirna hre fiah turin he thu a thliar hranna hi hriat reng thin a ngai ang. Thawhlehma thuah pawh taksa hi a ni tho leh tura chu, tisa ni lovin.

Bible chuan hetiang a min zirtir avangin taksa chu kan duatin, kan enkawlin, kan vawng tha tur a ni.

Tunah thlarau thu sawi ila :

Thlarau chu mihringa a bung khat dang, hlu zâwk emaw, ropui zâwk emaw chu a ni a. "Taksa tihlum a, thlarau tihlum thei lote chu hlau suh u," tih a ni a. Matthaia 10:28. Hei hian taksa boral theihnaah chuan thlarau a boral ve kher lo tih a hriattir. Mahse taksa tel lova thlarau ngawt chu mihring kim a ni lo va. Thlarau leh rilru leh taksa chuan mihring a ti-

tling a. Chung infinte chu Krista tlanna chuan
a tlan vek a, thawhlechnaah pawh kaih thawh an
la ni ang.

KHAIKHAWMNA

Tbuthlung Tharin a sawi dan tlângpui chu
mihring chu mize nei, mahni inhria, mahnia tum-
na nei a, dub thlanna nei a ni a. Pathian nena
inpawlina nei thei, Pathian annaa thang zel thei
a ni. A Pathian pawl theihna chu sualin a ti-
khawlo va, a fa nihna chu a tichat tawh a.
Krista chuan chung ata chu a tlan chhuak leh
a. Chu tlanna avanga Pathian nena inrem hnu-
ah chuan Pathian mijmuha a hlutzia te, a fa
nihna ropuizia te, Pathianin a kohna ropuizia
te hriain, chu kohna chhâng tur chuan ippeih a
tum hrām hrām a ni

BUNG VII

SUAL

Mihring thu kan ngaihtuahin, Pathian anpuia siam a ni a. Chu Pathian anna chu tihmelhem-in a awm a, fapa nihna pawh chu tihchahin a awm tawh a. Pathian thu leh kan hriatnain chu mi titu chu sual a ni tih min hrilh a.

Sual chu khawi ațanga lo awm nge? A bul chu engnge ni? Hei hi thil ngaihtuah harsa tak mai a ni a. Thuthlung Hluia a lan dânah pawh sual chu a awm ngei a, Adama thlahte chuan an pianpui zêl ni âwm chuan a lang a. Mahse Adama bawhchhiatna chu a bul a ni ngei tih hriatna a awm chuang lo. Adama tlûkna chu sual bul ni âwma a lanna chu, B.C. 180 lama Apogripha bu lamah a ni zâwk. "Hmeichhia avângin a ni sual bul chu a lo awm, amah avângin kan zain kan thi a ni." Ecclesiasticus 25:24. "Kan thlahtute chu a tîr ațangin Adama leh Evi nêl ka hmu a; tin, ka rûmin ka țap a; an sualnain chhiatna a rawn thlen chu ka sawi a; 'Keimah leh ka thlahtute chak lohna avangin ka chung a pik e,' ka tî a." 2 Enoch 41:1. "Aw nang Adam, engnge i tih? A tisualtu chu ni mah la, sual chu i chungah chang a tla lo va, nangmah ațanga lo awm kan zaa chungah

a tla a ni." 2 Esdra 7:118. Heng aţang hian sual bul chu Adama bawhchhiatna niin a lang a. Kan Lal Isua zirtirnaah chuan sual bul thu a lang lo va. Sual a awm ngei a, ngaihdamna pawh a awm ngei tih erawh chu a lang a. Paula zirtir danah chuan, Adama avangin sual khawvelah a lût tih a lang a. Sual chu Adamaah chhui luh a ni a. Chu aia hlâ chhuina chiang a awm loh avangin Adama tlûkna chu sual bula pawm theih a ni.

1. SUAL AWMZIA (Meaning of Sin).

(a) **Thuthlung Hlui zirtir dan :** Thuthlung Hluiah chuan sual tih hian pawm lam thil a kâwk deuh va, — chhung lam thu hi an la thlen meuh loh avangin. Sual chu vantlang nun dan leh Sakhaw lam nun dan tura Pathian dan pek awi lohna leh bawhchhiatna a ni. Chung lai hunah chuan sual chu mi zawng zawnga a awm angin, ni mal suaina pawhin vantlang a kâng tel thin a. Nakin hnu deuhva zawhneite leh mi thenkhatte ngaih dan chuan Pathian bruaia chu pawm lam thil chauh ni lovin, chhung lam a khawih ve tih a lang. Inthawina leh thil blan mal mal chu Pathian lungawina a ni tawn lo va, rura lam leh thuawina, thuthlung inchair chu a phut ta zawk a. Issa 1:10-20. Thuthlung Hluin sual thu a zirtirna sang ber chu Sâm 51 hi a ni.

(b) **Thuthlung Thar zirtir dan** :— Thuthlung Thara a lan dan chuan soal chu Pathian chung a soal a ni tel zelin a lang. Luka 15:18. Tin, mi zawng zawng mi soal kan nih a lang baw a, “Sim rawh u.” Marka 1:15. “Nangni mi soal mahin.” Matt. 7:11. Soal chuan rilru leh tumnaah zung a kai a, thiltihah a lang chhuak thin. Matt. 5:27. Johana ziakin a zirtir dan chuan, soal chu bawi nihna a ni. Johana 8:34. Soal lian ber chu, Pathian Fapa Isua rin loh a ni. 16:9. A lehkha thawh lamah chuan, Pathian kohna ang tlin zawh loh leh hmangaihna neih loh chu soal a ni. I Joh. 3:1-6. Dan bawhchhiatna I Joh. 3:4.

Paula ngaih danah chuan, sualin mi zawng zawng a huap tih a lang a. Soal chu mihring chhunga awm a, duhthlanna tichak lo theitu a ni. Rom 7:17. Tin, ngaihdamna thu a uor avangin, soal hnathawh raphlâkzia chu a rilruah a awm reng a ni.

Grik jawnga soal an tihna awmzia tak chu, ‘tum theih’ tihna a ni a. Thuthlung Thar pum puiah pawh thil tha lo, chi dang dang, soal a tihte hi, soal an nihna chhan ril tak chu, a titu khan a nih ang tur a ni ta lo va, a nih ang tur lovin a va awm ta zawk a ni. Soal kan ngaihtuahin, tih loh tur kan va tih hi kan rilruah a

awm thin a ni âwm e. Mizo tawngah pawh a awmzia pakhat chu, thil tih tûr anga tih loh a ni. Tichuan Pathian anga fel tûr sa reng kan ni a; mahse chu kan nih ang tûr kan nih phâk loh avangin mi sual kan ni ta. Thil tha lo eng-maw pui kan tih avângin mi sual kan ni a ni kper lo va, thil sual dang chu engmah kan ti lo a ni thei e; mahse thil tha titu kan nih loh avangin kan tih lohna chu kan thiltih sualna a ni.

Lalberin vawi khat chu khawvêl puma thu a rawn sawi khân, "Tûn hmaa ka thiltihah in-chhîrna engmah ka nei lo," a ti a. Kan ngai-sang hle. Amaherawhchu thil tha tih a neih chuan si loh chuan a sual chu a ni tho mai. Tichuan Kristian nuna mi an lo than len zêlin he thu hi an hmu fiah a, sualna ropui ber leh nasa ber chu tih tûr ang tih thin loh hi a ni tih an hmu chiang tulh tulh thin.

2. SUAL HLAWH

Adama sual kan kai zêl angin, a thiam loh-na pawh mi tîp chungah a awm bawk a ni. Isua pawhin mi zawng zawng chu sual thiam lohna hnuaia awmin a sawi a. Sual hlawn chu thihna a ni a. Thihna tur chu sual a ni bawk a. Adama thlah phawt chuan, sual hlawn, thiam lohna leh thihna chu an chang ta a ni.

KHAIKHAWMNA

Sual thu sawi hi chuan amah maia sawi theih a ni lo va, Pathian leh mihring sawi tel loh theih a ni lo. Pathian leh mihring inpawhna kawng pakhat chu a ni ve rêng a. Sual chu mihringin a hman chuan Pathian dan bawhchhiatna a lo ni a. Dân chu bawhchhiata a awm chuan, felna a thinur a. Chuti tak chuan sual leh mihring leh Pathian chu an intawk pha thliah a ni.

Kan sawi tawh bawk bâkah hian hêng hi kan la hmu thei bawk :-

1. Duhthlanna : Mihring chu chhung lama thatna dana thang lian zel theia siam a nih avangin, a tan duh thlan theihna chu a tul a. Mihring bul kan ngaihtuahin, felna bulah a intan tih kan hre chuang lo va, pawî khawih lo erawh chu a ni tih kan ring thei a. Pawî khawih lo ngawt chu chhung lam thatna a famkim tihna a ni chuang lo va. Chhung lam thatna awmtir turin sual chu a mamawh chuang lo va, thlêmna erawh chu a mamawh a. Chu thlêmna do zawh lohna chu sual a ni.
2. Sual chu mihring tumaa leh tih dan Pathian thil tum chung a hel thîn hi a ni.
3. Sual lam âwnna rêng rêng hi kan bulpui atangin dah bran theih a ni tawh lo.

4. Miaring chu thil siam inpumkhat a nih avangin, mi mal tuarna chu an tuar tlân a, lâwmnaah an lâwm tlâng a. Chuvangin mi dang sualnaah pawh kan sualna anga min khawih theitu a awm thin.

BUNG VIII

PATHIAN NENA INREMNA

“Pathian nen lo inrem rawh u.” 2 Kor. 5:20.

Pathian chu mi zawng zawng Pa a ni a, Amah nena inpâwl tlâng turin a duh a. Mahse inpâwna chu soal thimnain a hlah thim tawh tih kan hria a. Chutichuan mihring chu Pathian ngaihdamna leh soal leh a thiam lohna ata chhanchhuah ngaiin a awm tawh a. Thuthlung Thar chuan. Isua thihna chu soal thiam lohna leh soal thiltihtheihna lak ata ngaihdamna leh tlan chhuahna a ni tih a zirtir a.

Isaia 53-a Lalpa Chhiahhlawh, kan bawh-chhiatnate avanga hlim a, vuk thitlina kha, Isua, mi zawng zawng aia thia kha a ni tih kan hmu bawh a. T.T. 3:13,26. I Pet. 2:21-24.

Inthawina dan angin Isua chu mite soal thupha chawina leh tlanne ni tura thi a ni tih chu

hengah hian an lang : Rom 3:25, I Pet. 1:19, Eph. 5:2, I Johana 4:10. "Pathian hnena min hruai theih nan, mi fel chuan mi fel lo aiin a tuar a." I Pet. 3:18.

Chutichuan Krista tuarna kraws chu Pathian leh mihring inremna siamna hmun a ni a. Kraws chuan Pathianin sual a dozia leh thiam loh a chantirzia min hrilh a. Mi sualte aia Isua tuarna leh thihna chuan, sual sualzia leh Pathian hmangaihna makzia min zirtir a. Krawsa thil mak tak hmuh theiha awm thin chu Pathian hmangaihna mak tak chu a ni.

*Aw, hmangaihna mak tak chu,
Min hmangaihna a ni,
Ka Chhandamtu chu a rawn tir,
Kalvaria thi turin.*

Kraws thurûk chu, kan nun dan laipui bera kraws kan hman hunah kan hre thei chauh vang. "Sualte avangin a thi," tih leh, "Mi fel lote aiin a tuar," tih aia chiangin Thuthlung Thar zirtirna kan hmu chuang lo.

Krista, mi fel chuan, Pathian felnain a phût, thatna chu, a nunnain a zo va; felnain a phût, sual hremna chu, a tuarna leh thihnain a tlâk a. Chu tuarna chu hmangaihna hnathawh a ni a. Isuan sual leibat a tlâk, mi sualte tana lo pawm chu, a felna thiltih chauh ni lovin, a hmangaihna rah a ni.

Chutichuan,

Felna leh hmangaih inremm,
Khawvêl thiam lo hi an fâwp.

Chu hmangaihna hnathawh chuan, mi sual-
 te leh Pathian chu remnaah a hruai khâwm ta
 a ni.

BUNG IX

PIAN THARNA

Pian tharna kan ngaihtuah dâwn chuan, zîm
 lutuka ngaihtuah tur a ni lo va, pian tharna a-
 tana thil tel leh tûl apiang chu sawi tel tur a ni
 a. Sap jawnga 'Conversion' an tih hi, 'Lamlê-
 na' tia lehlin a ni a. Khawvêl mi, ramhuai bia
 leh milem biaten an awm dan leh tum dan leh
 nun dân leh rin dan an lamlê a, nun thara an
 lo nun a, rinna thar vuana Kristiana an rawn
 insiamna chu, lamlêna chu a ni a. Tin, Sap
 jawnga 'Born again' emaw, 'Born anew' emaw
 chu, 'Piang thar' tia lehlin a ni a. Nikodema
 leh Isua inbiakna thu kha hei hi a ni a. Mah-
 se ringtuten an neih ngei tur, he pian tharna
 hian beng thil pahni, lamlêna leh pian tharna
 hi a huap a ni tih hi theihngihh tur a ni lo.

Engpawh ni se, he thil pahnih miin a neih theihna chu, Pathian leh mihring hnathawh inkawp chu a ni agei mai tih hi hre reng ila, Pathian Thlarauvin mihring chu a ko va, chu chu mihring chuan a chhâng a: chu kohna anga awm tur chuan a bei a, a lo hlawhtlinna pawh chu Thlarau hruaina bawh a ni. Horeb lungpuiah Pathian a ding a, Mosian lungpui a vua a, Pathianin tui a luan chhuahtir a. Exodus 17:6. Philippi khuua hmeichheho hnenah Paulan thu a hril a, Lalpan Ludi thinlung a tivâr a. T.T. 16:14. Mihring chhandamna lampangah rêng rêng hi chuan, Pathian leh mihringin chanvo an nei ve ve tih hi theihnghilh loh tawp tur a ni.

Pathian Thlarauvin mihring nunnaah hian Kohhran hmangin emaw, a châng chuan hmang lo pawhin hna a thawk a, Pathian thilpêk a ni a, Thlarau puih loh chuan neih theih a ni lo. Pian tharna hi a châng chuan vawi khata awm thut ni âwmin a lang thei a, a thenah chuan nih pawh a ni rêng a, Paula te, Philippi lung in vêngtu te ang kha. T.T. 16:33. Dan naranin mi rilru chhung lamah arûka thawktu a awm a, a thawk reng a, a tâwp a thlen hunin lo awm thut angin a awm mai thin a ni. Chu mibring chhung lama thawktu chu Pathian Thlarau a ni.

Pian tharna chuan chhûng lampang leh pâwn lampang a nei a, thua sawi hran theih chauh, lâk hran theih loh a ni a; chu chu mihring lampang leh Pathian lampang a ni.

1. MIHRING LAMPANG

(1) **Sual inhriatna** : Dan naranin mi a pian thar hmain sual inhriatna a nei thin; mahse mi zawng zawngin an nei chuang lo. Isaia chuan Lalpa inlârna a hmuh veleh, "Hmui bawlhhlawh pu mi ka ni," a ti chauh a ni. Isaia 6:5. Sual inhriatna thûk tak hi, Lalpa hruaja rei tak awm tawhte neih theih chauh a ni a. Mi sual bera inngaitute chu Mi thianghlim berte an ni zâwk thin. Piang thar turin a inhriatna hi chu tling lo leh puitu ngaia inhriatna a ni deuh ber thin. Mihring lampang kan ti chungin, Pathian Thlarauvin a neiatir a ni tho bawk a ni.

(2) **Simna** : Simna chu kan Lal Isua leh Johana thupui pakhat a ni. Thinlung lam leh pawn lam lan dante a tha zâwk atana tihdanglam a, a chhe zâwk chu a tha zâwka thlâk a ni. Sual avanga inchiâra beidawna mai a ni lo va, simna tak chuan sual a hawisan a, a kalsan thin. Awm dan leh tum dan dik lote chu siam that theih a nih a hria a; chu siamthatna chu a nei thei ugei tih pawh chu a hria a, a beisei tlat thin. Inchiârna mai ni lovin, tih tawh lohna a ni zawk.

(3) **Rinna** : Pian tharna leh chhandamna thlenttu rinna chu, Isua chu Pathian inlârna kima ngaiin, Chhandamtu atana pawm a, engkima rin chhan bera neih a ni. Rinna chuan hma lama thlira, a ûmin a ûma, a man thin. Rinna chuan ringtu chu Lal leh Chhandamtu Isuaah chuan a phuar nget thin. Hei pawh hi mihring lampang ti mah ila, Pathian Thlaraudah tho a inghat a ni. “Tuman Pathian Thlaraudah chauh lo chuan, Isua chu ‘Lalpa’ an ti thei lo,” I Kor. 12:3.

2. PATHIAN LAMPANG

(1) **Thiam chantirna** : He thu hi rorêlna tawng a ni. Thiam lo chung chung thiam pawm hrâm hrâm a ni lo va, mi thiam ngeite thiam chang tia puanna a ni. Miin sual leh tling lo tih inhria a, a nun hlui sim a tumna thar nen, beiseina thar nena Lal Isua chu Chhandamtu leh Lal atan a pawm a, a rin tâk hnuah chuan, Krista felna chu sintira awmin, Pathian felnain rin avangin thiamah a puang chhuak ta a ni. Krista felna avangin Pathian felna chu a chungah a lungawi ta a ni. Luthera chuan heti hian a ti : “He thurin hi a pawm leh pawm loh athuin Kohhran chu a dingin a tlu a ni.

(2) **Pian tharna** : Ringtute Isua Kristaa nun

thara an nung chu, Thlarau hnathawh a ni. He thu sawi fiah nana hman hi a ni a. Hetiangin Thuthlung Tharah kan hmu :-

- (a) Pian thar. Johana 3:3
- (b) Pathian hrin. 1 Petera 1:23, 1 Joh. 4:7
- (c) Thil siam thar. 2 Kor. 5:17
- (d) Tih nun. Eph. 2:1, Rom 6:4, Kolossa 2:13.

Piang thar tur chuan pawn lam lan dan tihdanglam a, chhung lam awm dan thara awm a, Pathian Thlarauvin a tihchak a, a rawn pian thartir a ngai a ni. Mi tha pangngaite leh tha tharte pawhin he thil hi ang khatin an hmu thei a. Chuvangin zawi zawia intan tih theih, vawi khata awm thut tih theih a ni reng mai. "Pathian ram chu hmuh theihin a lo kal lo ve," tib angin, Pathian Thlarau chuan keimahni thlarau nen arukin a thawk thin a ni.

(3) **Faa siamna** (Adoption) : Rome mite chuan an chhiahlawhte leh mikhualte pawh faa siam theina dan an nei a. Faa an siam tawhte chu an hrin ang chiahin an ngai a. Chhe lam tha lamah chhungkuaah an tel nghet tlát a ni. Paulan he thu a hman hian, ringtu thiam chang chu chhandam mai a ni lo va, piang thar mai pawh a ni lo va, Pathian chhungkuaah a tel ve tawh a, chhungkaw chanvo 'zawng' zawngah a bang bik lo a tilang hle mai.

3. PIAN THARNA ZUITUTE

(1) **Hriat chianna** (Assurance) : He thu hi Paula zirtirna a ni a. Tlante chuan an sual ngaihdamna leh an chhandamna leh fa an nihna hi an hre chiang reng a. Rom 8:16. Kristian Sakhuana thil tul pakhat chu a ni ve rêng mai. Westminster thurinah pawh an uar a, Wesleya pawhin a uar hle. Puritanste pheii chuan a lutuk thlengin an zirtir a, "He hriat chianna hi miin an neih loh chuan chhandam a ni lo vang," an ti hial a ni.

Ringtu tak tak chuan hei hi a neih hmair hun rei tak pawh a nghâkin, harsatna pawh a sual fo thei a. Mahse Pathian Thlarau hruaiin he thil hi a nei ngei thin a ni. A neih tawh chuan huai tak leh hlawhtling takin a tih tur pual chu ti turin a inpeih a, a chhandamna lawmna chu a chang a, a tih tur kawng chu lawm takin a zawh thin. Ringtu tak chuan he thil hi a hloh leh thei a ni thei e; mahse Thlarau chuan a pe kir leh a, a sualna briattirin a hum a, a zilh a, khawvel nen thiam loh changa an awm loh nan Lalpa thununin a awm thin. Sâm 51:8, 12, I Kor. 11:32.

(2) **Tihthianghligna** : Hei hi inthawina tawng a ni. Biak bûk bungbêl leh a hmangtute leh an ran talh turte chu tihthianghligna an ni thin. Tuna

kan sawi lai hi cawh chu ringtu thiam changte tihthianghlim thu a ni a. Kan Lalpa chuan, "Anni chu thutakin tithianghlim rawh, i thu chu thutak a ni," a ti a. Johana 17:17. Hengte hi chhiar ila Rom 6:19, I Kor. 6:11, I Tim. 4:5, Hebrai 10:10;12:14. Sual laka chhan chhuah a nih anga sual ata fihlîm a, nun thar, thianghlima nung tura Thlarau tanpuina a ni. Ringtu chhunga awm reng Pathian Thlarau hnathawh chu a ni.

(3) Puitlinna : Famkimna vuah a ni bawk. "Puitlin lam i pan ang u," Heb 6:1 tih angin, ringtu thiam chang tihthianghlim mēka chuan, famkim lam leh puitlin lam pana ûm zel hi Paula zirtirna a ni a, "Famkim tawh reng inti ka ni lo va, a ûmîn ka ûm zâwk a ni," a ti a. Phil. 3:21. "Krista famkimna lenzia tluka kan zaa kan lo awm hma loh zawng," a ti bawk a. Eph. 4:11-13. Khawngaihnaa shang lian a, puitling a, Krista hmaa sawisel bova awm turin Paulan a zirtir a. Naupang rilru te bân a, leia thil awmah rilru ngat tawh lo va, rilru sâng zâwk leh tumna sâng zawk nena tiam chin lam pan tal tal turin Thlarau chuan a pui thin a ni.

Famkimna tâwp ber chu, Lalpa Pathian chu thjnlung leh chakna leh theih tâwpa hmangaih a, mahni anga vengte pawh hmangaih a ni. Rom. 13:9.

BUNG X

KOHHRAN

Kohhran chu. pâwlho, khawvel sual ata koh chbuah, Isua Krista Pathiana pawm a, a tlanna ringtute hi an ni. Aigupta ata Israelte koh chhuah anga koh chhuah, Pathian rawngbawltura sual sim a, Isua hminga baptisma changte chu an ni. Tu din chhuah nge ni? Kan Lal Isuan, "He lungpui chungah hian ka Kohhranho ka rem ang," a ti a. Mat. 16:18. Hei hi a lan tanna a ni a. Mi thenkhatte chuan Pentikost ni kha a pianna ni a ni, an ti a; mahse a pian ni chu a ni lo va, a baptisma chan ni a ni zâwk. A pianna chu chu mi hma kum thum laiah tawh kha a ni a, a member hmasate pawh Galili dil kam vela sangha mantu a kohte kha an ni. Pentikost ni kha chuan Jerusalema hming ziakra buah ngawt pawh za leh sawmhnih an tlin tawh kha. T.T. 1:15. Kohhran inrem fel chu a la ni lo.

Pentikost hnu lamah chuan Isua dam lai ai chuan a inrem fel deuhvin a lang a; mahse a insiam vel dan chu a la mâwl hle tho mai. Unau inpâwl khâwm a, an thil neihte intâwm a, tirh-kohte zirtirna dawn a, tawngtai leh chhang phela inpâwl khâwm a ni ber a. T.T. 2;42-45. A tirah chuan Judate Sunagog-a tel theih lohna pawh a

la ni lo va, Juda dan chhunga pâwlho inphûm ru a la ni rih a. Isua chu Lal a ni, tia Pathian anga chibai an bûk a, an puan chhuah chinah Juda Temple leh Sunagog ata an intihrang a. An ni tin ei tur ngaihtuahtu turtein Upa an inthlang a. Hetiangin zawi zawiin a insiam nghet tial tial a ni. Paula ngaih dan chuan Kohhran hi pahnih angin a lang : Vantlang zinga Lal Isua hming tan a, jawngtaia inkhâwm-hote chu Kohhran a vuah a. Chu aia ril zâwk leh tak zâwk chu a la awm baw; chu chu 'Fa tir, vana hming chuang Kohhran chu' a ni a; hei hi Kohhran hmuh theih loh chu a ni. Chu Kohhran hmuh theih loh chu In leh Taksa leh Mo nen a tehkhin a. Thlarau lama Kohhran leh Krista inzawmna sawina a ni.

Kohhran chu betiang hian lo sawi ila :—

1. Kohhran chu inpâwl na a ni. Krista leh a Kohhrante an inpâwl angin, a Kohhrante an inpâwl.
2. Inpumkhat na a ni. Krista nen an inpumkhat angin, Kohhranho chu an inpumkhat tur a ni.
3. Kohhran chu puithiam pâwlho a ni. Puithiam chuan Pathian hnena mihring ai a aw h a, mihring hnénah Pathian ai a aw h baw.

4. Kohhran chu Krista thil siam thar a ni. 'Ka Pa ram,' ti tawh lovin, 'Ka Kohhran,' a ti zâwk.
5. Kohhran chu a nghet a, a hlun a, "Mitthi khaw kulh kawngkhar pawhin a ngam lo vang."
6. Krista aiawhtu a ni. "Van ram chabi ka pe ang che," a ti a. Petera chu Kohhran in-nghahna Lungpui chu a ni lo. Lungpui chung a rem Kohhran enkawltu chauh a ni.
7. Kohhran chu Krista chênna a ni. "Ka hminga pahnih emaw, pathum emaw in-khâwm an awm chuan, an zingah ka tel," a ti a.
8. Kohhran chu Krista zawmna ata thihna pawhin a tihrang thei lo. Leia Kohhran la awmte leh vana mi, 'Fa tîr, vana hming chuang Kohhrante' chu Kristaah an la in-chhung khâwm a, Krista an la pâwl tlân a-vingin then darhin an awm chuang lo. "Mit-thi khua pawhin a ngam lo" a ni.
9. Kohhran chu Pathian ram aiin a zîm zâwk a; a zau zâwk baw. Kohhrana mi pawh Pathian ram pawn lamah an awm thei a, Pathian ram chhunga mi pawh Kohhran pâwnah an awm thei baw.

BUNG XI

SAKRAMENT-TE

Roman kohhran leh Grik kohhran chuan Sakrament pasarih an nei a. Keini erawh chuan pahnih chauh kan nei – Baptisma leh Lapa Zanriah hi. Roman leh Grik kohhrante neih chu, Baptisma, Nemnghehna, Lalpa Zanriah. Sim entirna, Hriak thih, Hotute indawt dan leh Inneihna. Baptisma leh Lalpa Zanriah hi chu Protestant Kohhran chuan an pawm vek a. Quakersho erawh chuan Sakrament an nei lo hrim hrim thung a. Dam chhung hi Sakrament-a siam theih vek a ni, an ti a ni.

Pawn lam thil atanga chhung lam thlarau thatna kan hmuh theihna hmanrua ber a ni. Chuvangin Kohhran a din chhung chuan thlahthlam theih a ni lo vang.

1. **Baptisma** : Hei hi Grik tawng chuan 'Baptizo' an ti a, tuia hnim emaw, thlawr emaw, in-chiah emaw tihna a ni. Kristian Kohhranin thil serha hmang a, Pa leh Fapa leh Thlarau Thianghlum hminga Kohhrana tel ve tura ringtua lak tihna a ni. Judate chuan tuia insil fai hi sakhaw thuan an hmang tam hle a, an saphunte pawh hi baptisma changa an lak luh an ni. Chu dan chu chhawmin Baptistu Johana chuan sim-

na baptisma a chantir thin a. Chuta t̄angin kan Lal Isua tihngheh leh chhawm chhuahin zirtirte chuan an ti ve thin niin a lang. Johana 4:2. Tin, Isuan a thawh leh hnuah pawh he thil hi a la fuih tha ta deuh deuh va. Mi nung zawng zawngte chhandamna chang tura buatsaihna tur-in a zirtir. Matthaia 28:19.

Kohhran lo din tirh ni a t̄angin he dan hi an hmang nghal a, Kohhran ni si, baptisma nei lo an awm lo. P̄awl engpawh baptisma nei lo chu Kohhran an ni lo va, p̄awlho engemaw avang leh engemaw atana siam chhuah mai an ni z̄awk. Isua chu Lal leh Pathian angin be mah se, Kohhran vuah an ni ve lo.

Paula zirtir dan chuan, baptisma chu pian tharna thutiam angin a lang a. Chhung lama piang thar tak takte chuan, an khawvel sual thihsan a, sual nen inzawmna an nei tawh lo tih entir nan, baptisma chu ph̄umna angin a zirtir a. Ringtute inpumkhatna a nih avangin pian tharna nen hian ngaih hran lutuk theih a ni lo.

Sual thihsan a, Isua Chhandamtu anga pawm entirna chu a nih avangin, ringtu puitling apiangte hnenah p̄ek a ni thin a. Kristian chhungkua an awm hma chuan nausen baptisma chantir hi a awm lo va. Kristian chhungkua an lo awm

hnuah nausente an chantir ve chauh a ni. Chu chu A.D. 202 lamah a ni.

Nu leh paten an fate baptisma an hlanin heng hi hriat reng tur a ni :—

- (1) Nu leh paten an fate Krista leh Kohhran-ho hnenah an hlân a. Lalpa thununna leh zirtirnaa châwm lian turin chhia an chham a: chuvangin anmahni pawh an inhlân tih a entir.
- (2) Nausen lo lâwmtu Kohhrante chuan, hun lo la awm zel tur thlengin nausen enkawl leh châwm len thuah chuan mawh an phur ve a ni.

2. Lalpa Zanriah : Hei hi Lal Isuan Baptisma ang bawka sual sim a, Pa leh Fapa leh Thlarau Thiangelim hminga baptisma changtuten an serh atana a ruat a ni. Jerusalem pindan chungnunga a zanriah chaw kîl hnuhung bera a ruat chhuah a ni. Mt. 26;23-26.

Kohhran awm khâwmhovin an Lalpa thih-na leh a mize famkim leh khawvel chhandam nana a hnathawh an hriat reng nan a ruat a ni a. Rawngbawltuin chhang a phel a, uain a leih chhuah chuan, a ringtute tan Lal Isua a inhlân a, an sual tiemai nan leh an chatuan nunna chaw ni turin a thisen leh a taksa a pe zo tih a entir. A changtute chu a inhlântu angin hma-

ngaihnaa inpumpek turin a phût ve a. Tlâk lova changtute chuan anmahniah mawhphurhna an nghat a ni.

He dan hian Krista leh a Kohhran chu lei leh vanah an inzawm tih a entir bawk a. Krista leh Kohhrante an inzawm angin, Kohhran leh Kohhran chu an inzawm tih a entir bawk. Lalpa thihnaah chuan hnam tinan inzawm angin, lei leh van pawh an inzawm ta. Changtuten an chan apiangin, an Lalpa inhlanna hre rengin an Lalpa tan an inhlân vein, an thutiamte tihtharin a awm leh tur a ni. Ringtute nena inhmuhna tura a tiam a ni a, Thlarauvin a lo tel ve thin tih hi theihngihl tur a ni hauh lo.

NGAIH DAN THENKHATTE

1. **Roman Kohhran** : Chhang leh uain chu Lalpa hnena blan a, puithiamin a chhampual hnuah chuan, chhang leh uain a ni tawh lo va, Lalpa taksa leh thisenah a chang taktak a ni, an ti.

2. **Luthera** : Puithiamin a chhamphual hnuah pawh, chhang leh uain chu a la ni tho va; mahse Lalpa taksa leh thisen chu chhang leh uainah chuan a lo tel ve a, a rawn zawm ve a. Krista taksa leh thisen chakna chu a lo awm ve ta a. Thîr hi meia rawh chuan a lo sâ a, a lo ling a; mahse thîr a la ni zel a. Chutiangin Krista

taksa leh thisenin a rawn pawlh avangin chak-na a nei ta a ni.

3. Calvin : Chhang⁴ leh uainah chuan Krista chu Thlarauvin a lo tel ve a. Thlarau lam malsawmna leh inpawlina thianghlim chuan a rawn zawm a. Krista taksa leh thisen entirna a ni a, entirna ringawt erawh chu a ni lo va, thlarau lam malsawmna hnâr a ni.

4. Zwingli : Lalpa thihna hriat rengna a ni ringawt mai a ni. Chhang phel leh uain leih chhuah chu Krista taksa leh thisen chhuak entirna a ni. Entirna mah ni se, Lalpa chu Thlarauvin a lo tel ve a ni.

Protestant Kohhran tam berte chuan heng ngaih dan 2,3 leh 4-na te hi an pawm ber a, 3-na leh 4-na hi ngaih dan zau ber a ni.

BUNG XII

THIL HNUHNUNGTE

Thuthlung Hluiah chuan Jeremia hun thleng khan mi mal mawhphurna chu a lang mang lo va, sualna leh thatna thua pawh chhungkua emaw, hnam pum emaw chungah mawhphurna a tla thin. Sualna leh felna rahte pawh tun dam chhung la laah a lo thleng thin. Mi lian leh tê thlei chuang lovin mitthi khuaah an kal tih hi thlarau lam thua an ngaih dan kan hriat chu a ni. Joba bu leh Sam 49 leh 73-ah chuan mi mal thu - thlarau thih theih lohna a lang a. Heng Sam-ahte hi chuan mitthi khua chu mi ualte chauh chenna ni awmin a lang a. Mi mal-in Pathian an pawlna atangin thlarau thih theih loh thua ngaih dan hi a lo thang zel a ni.

Mi mal chungchanga ngaih dan a thang zel kan tih ang hian, hnam pum tana beiseina pawh **thang** ve zel a; chu chu Messia lalna ram lo thleng tura an ngaih chu a ni. He leiah hian Davida ropuina chu a lo thleng leh ang a, tah chuan Gentailte pawh an tel ve ang, tih a ni a: Israel mi felte pawh he rama cheng tur hian an tho leh ang. Isaia 24-27. B.C. 200 lai vel hi he Messia ram lo thleng tur an tih hi an sawi uar lai ber a ni.

Thuthlung Tharah erawh chuan chutiang êma sawi lanna chu a awm lo va, "Tun dam chhung hun" leh "Hun lo la awm tur" erawh chu a lang a. Lal Isua sawi danin, he ram lo thleng tur hi Isua chhûm chung a lo kal hun chu a din tanna tur ni âwmin a lang a. Chanchin Tha hun hi nge ni ang, hun thar tih hi hriat rual a ni lo.

Thlarau thih theih loh thu hi kan Lalpa zir-tirnaah tlêm chu kan hmu : "Ani chu mitthi Pathian a ni lo va, mi nung Pathian a ni zâwk, ani ngaih chuan mi zawng zawng an nung si a." Luka 20:38. Thlarau thih theih lohna kan tih avangin, mi zawng zawngin chatuan nunna an chang tibpa a ni hauh lo. Chatuan nunna thu chu Pathian leh mihring inhman tawn danin a zir zâwk. Johana 17:3; I Joh. 5:12.

1. RORELNA

Thuthlung Thar chuan rorêlna a awm ngei dawn tih min hrilh a. Van ram luahtu turte chu mihring zing ata hlîr ngei âwmin kan hmu a. Khawvel pum neih a, nunna chân a hlâwk lohzia te, borolna kawng zau te, Juda Iskariota tân pian loh a that zâwkzia te kan hmu a. Heng thute hian rorêlna lo awm tur chu an kâwk vek a ni. Chanchin Tha pathumte chuan

rorêlna chu khawvel tâwpa awm turin an sawi a. Chanchin Tha palina erawh chuan, 'tun lai' hi rorêl lai niin a sawi. Johana 3:18. Heng bu-te hi inkalhin a lang deuh va; mahse an rorêl thu chhuak chu a inkalh chuang lo. Johana ziaka mi chu, Isua rin leh rin loh thu a ni a, ziaak danga mi chu, an thiltih that leh that loh thu a ni.

2. KRISTIANTE BEISEI

1. **Chatuan nunna** : Tun lai hi nakin thu tur buatsaih lâwkna a ni. Isuan, "Kei ka nun avangin nangni pawh in nung ang," (Johana 14:19) a tih hi, chatuan nunna beiscina bul a ni. Ringtu nunna chu "Pathianah chuan Krista hnenah thuhîrûkin a awm" avangin thihnain a hneh lo va. Thihna tûr chu sual a ni a, sual chu hnehin a awm tawh baw a. 1 Kor. 15:54, Kol. 3:3.

Ringtute thlarau chu thih hnuah khawnge an kal, tih zawhna hi a pawimawh hle. He thuah hian ngaih dan pahnih, Biblea innghat ve ve a awm a :-

(a) **Chawlh lâwkna** : Hei hi Isua kianga mi sual khenbeh hnena kan Lalpa thutiam, "Ka hnenah Paradis-ah i awm ve ang," tih leh mi hausa leh Lazara thu hian a tanpui hle.

(b) Ropuinaah an kal nghal : He thu hi Phil. 1:23 leh I Thes. 4:17 hian a tanpui bawk.

He ngaih dan pahnih hi kan pawm ve ve dawn chuan, hetiangin ngaih dan a awm thei bawk ang : Nausen laia thite leh thlarau lam hun remchang nei hman lote chu Paradis-ah an châwl rih a, (hei hi Roman ngaih dan chanve a ni) Kristian fel leh puitlingte chu Lalpa hnenah an kal nghal. Engpawh ni se, "Mi felte chu an Pa ramah ni angin an êng ang," tih leh "Pa, ênga mi thianghlimte ro chu an tâwm ve," tih chu ngaih dan him tâwk a ni.

2. Taksa thawhlehna : Vantlang rorêlsakna awm dawna kan ring angin, vantlang thawhlehna a awm bawk ang. Isuan Marthi hnenah, "Kei hi thawhlehna leh nunna ka ni, tupawh mi ring chu thi mah sela a nun reng ang," a ti a. "Thlâna awm zawng zawngin a aw an hria ang a, an chhuak vek ang." Johana 5:28. "Thil suaf titute pawh thiam lohna changin an tho leh ang," 5:29. Thuthlung Hlui leh Tharin min zir-tir a; tin mitthi tho lehte leh Lal Isua taksa ngei tho lehin min hriattir bawk a. Krista chuan kan taksa ngei pawh a tlan tel avangin a tho leh ang.

Taksa thawh leh thu kan sawiin, eng hi nge tho leh tur chiah sawi fiah hi a ngai thin. Kan

taksa pangngai, tawih theia hi chu a ni lo tih briat fiah theuh a ni awm e. Tihdanglam taksa puin kan tho leh dawn a ni. Paula hian tisa tih leh taksa tih hi chiang takin a thliar hrang. Tisa chu, kan mihring chak lo awngrawp tak hi a ni a. Taksa chu, kan mihrinna pumpuia hi a ni. Hei hi briat hran thiam a harsa deuh a ni thei e. Tisa leh thisen hi zawngin van ram a luah dawn si lo va. Thawh leh thu hi, thlai chi chîn nen tehkhin a ni thin; thlai lo to chhuaka kha chu, a chi kha a ni tawh lo, a danglam hle tawh a ni.

3. Isua lo kal lehna : Kan Lal Isua chuan Pathian ram tifamkim turin a lo kal leh dawn ngeiin a insawi a. Tumahin an ringhlel lo va. Mahse a lo kal lehna chu thlarau lam thil nge, tisa thil tih hi inchuh theih tak chu a ni. Thlarauva a lo kal lehna tih ringtute chuan heng hi an tan chhan : Matt. 10:23, Marka 9:1, Joh. 14:18. Tin, taksa ngeiin a lo kal leh ang tih ringtute chuan inngahna an nei tha berin a lang. Tin, Paula ngaih dan pawh hi a thang zel a ni. A lehkha thawn hmasa Thessalonika lamah chuan, Isua chu lo kal leh lawk dawnin a sawi a. Lehkha thawn hnuhnung lamah erawh chuan a sawi lang ta mang lo va. A sawi lan-na ber chu Pathian ram tifamkim tura zawi

zawia Chanchin Thain engkim mai hi Kristaa a la hip khâwm tur thu a ni ber. Eph. 1:8-10, Kol. 1:19,20.

Engpawh ni se, Lal Isua chuan a bul a tan tawh mihringte Pathian nen an inrem lehna hun tifamkim tur chu amah ngaitute nen inhmuh khâwm a tiam a, inkhâwmna ropui tak a la awm dawn tih hi phat rual a ni lo ve.

3. MIHRINGTE CHATUAN HMUN TUR.

Thurin tam tak ngaihtuah hnuah pawh ringtu thilungah he zawhna hi a lo awm thin: Thih hnuah mihringte thlarau chu khawnge a kal ang a, khawnge a tâwp ang? Krista Isua ringa Pathiana innghatte thlarau chu kumkhaw nunnaah an kal ang tih a ni a; mi sual, Krista chhandaamna thlawn pêk la duh lotute chu, kumkhaw hremnaah an kal ang, tih a ni baw a. Mahse kumkhaw hremna thuah hian ngaih dan danglam deuh a awm a. "Kristaah mi zawng zawng tih nun," tih leh "Mi zawng zawng ka hnenah ka hip ang," tih leh thu dangte an tan chhan a. Mi sualte kumkhaw hrem an nih chuan, Pathian hmangaihna chu a famkim lovin, mihringte anga tâwp nei a ni ang. Hun eng chen emaw hrem mah se, a tawp chuan sualna chu hneha a awm avangin thlarau zawng zawngin chhanchhuahna an chang leh ang a, Pathian nen an

la inrem leh ang, Pathian chu engkima engkim a nih theih nan, an ti a. Mahse Protestantte thurin tlângpui ber chu, mi fel chu kumkhaw nunnaah an kal ang a, mi fel lo chu kumkhaw hremnaah an kal ang, tih hi a ni ber a.

Hremna thua hian, miin chatuan hremna a awm an rin loh deuhna chhan pakhat chu, hman lai mâwl laia rin dan, mei leh kâta kang hluah hluah hmuna indah reng kha an rilrua a awm thin vang a ni. Pathian chu hmangaihnaa khat a nih avangin chutiang taka hrem chu a duhin a rinawm thei mang lo va. Amaherawhchu Pathian Fapa ring lo chu, tun apangin thiam loh chantir an ni tawh.

Pathian hian mi hrem chu a duh lo rêng. A hmangaihna ângchhungah chuan min hruai luh a duh reng a ni. Chu mi a duhna chu keinin kan lo pawmin, kan lo hnial thei. A hmangaihna hung chhunga lût duh lo tlat chu, Pathian tan pawh tih ngaihna a awm chuang lo. Chu hmangaihna pâwna awm reng chu, chatuan hremna chu a ni lo thei lo vang.

Ngaih dan dangte hi hetiangin awm mah se, a tâwp berah chuan hei hi hria ila : Pathian chu kan Pa a ni a, a hmangaihna chu a dai ngai lo va, tâwp chin pawh a nei lo va. Hrem hmun thûk bera mi pawh tlan theitu a ni a,

'tuma boral duh lo va, mi zawng zawng lo sim duhtu', a ni a (2 Pet. 3:9). Tun dam chhungah pawh, hun lo la awm leh turah pawh, a khawngaihna len nasatzia chu kan sawi thei lo vang. Kumkhaw hremnaa mi a kal pawhin, Pathian hmangaihna a daih loh vang a ni lo vang, Pathian hmangaihna leh zahngaihna duh lova a hnar vang zawk a ni ang; chu aia thui chu kan chhui pha lo a ni. Pathian Leikhabuin min hrilh angin, "Juda chuan a awmnaa kal turin heng rawngbawl hna leh tirhkoñ hna hi a tlâwm-san a," tih a ni a (T.T. 1:25). Mi tin hian mahni 'awmna' atan mawh kan phur theuh a ni tih hi theihnghilh tur a ni lo va. Kan chatuan hmun tur chu keimahni leh Pathian kutah a inghat a, kan Pathian pawm dan leh nun danin kan 'awmna' tur chu a rêl dawn tih hi kan phat thei lo vang.